

清

史

稿

清史稿

邦交志二

英吉利

英吉利在歐羅巴西北清康熙二十七年置定海關英人始來互市然不能每歲至雍正三年來粵東所載皆黑鉛番錢羽緞哆囉嘩諸物未幾去七年始通市不絕乾隆七年冬十一月英巡船遭風飄至廣東澳門總督策楞令地方官給貨糧修船舶遣之二十年來甯波互市時英商船收定海港運貨甯波踰年遂增數船舶旋禁不許入浙並禁絲舫出洋二十四年英商喀喇生通事洪任輝欲赴甯波開港既不得請自海道入天津仍乞通市甯波並詰粵海關陋弊七月命福州將軍來粵按驗得其與徽商汪聖儀交結狀治聖儀罪而下洪任輝於獄旋釋之二十七年夏五月英商昭嘯等以禁止絲舫其貨艱於成造仍求通市粵督蘇昌以聞許之然仍限每船只許配買土絲五千舫二蟹湖絲三千舫至頭蟹湖絲及綢緞綾匹仍禁五十八年英國王雅治遣使臣馬夏爾尼

等來朝貢表請派人駐京及通市浙江甯波珠山天津廣東等地並求減關稅不許六十年復入貢表陳天朝大將軍前年督兵至的密英國曾發兵應援的密即廓爾喀也奏入敕書賜賚如例嘉慶七年春三月英人窺澳門以兵船六泊雞頸洋粵督吉慶宣諭回國至六月始去十年春三月英王雅治復遣其臣多林文附商船來粵獻方物十三年秋九月復謀襲澳門以兵船護貨爲詞總督吳熊光屢諭使去不聽遂據澳復以兵船闖入虎門進泊黃埔命勦辦絕市礙熊光職英人始於十月退師明年春二月增築澳門砲臺夏五月定廣東互市章程十九年冬十一月禁英人傳教二十年春三月申鴉片煙禁二十一年夏六月英國遣其臣加拉威禮來粵東投書言英太子攝政已歷四年感念純皇帝聖恩遣使來獻方物循乾隆五十八年貢道由海洋舟山至天津赴都懇總督先奏時總督蔣攸銛方入朝巡撫董教增權督篆許其暫見授督撫大吏見邁遜諸國貢使禮加拉威禮不受再三議相見儀教增不得已許之其日總督及將軍兩副都統海關監督畢坐節堂陳儀衛加拉威禮上謁免冠致敬通

事爲違意教增離坐起立相問答允爲入告加拉威禮徑出比教增奏入而貢使羅爾美都副貢使馬禮遜乘貢舟五已達天津帝命戶部尙書和世泰工部尙書蘇楞額往天津率長蘆鹽政廣惠伴貢使來京一日夜馳至圓明園車路顛簸又衣裝皆落後詰朝帝升殿受朝會時正使已病副使言衣車未至無朝服不能成禮和世泰懼獲譴跪奏二貢使皆病遂却其貢不納遣廣惠伴押使臣回粵初英貢使齋表帝覽表文抗若敵體又理藩院迎接不如儀帝故疑其慢絕不與通羅爾美等既出都有以貢入告者帝始知非貢使罪復降諭錫賚追及良鄉酌收貢物仍賜國王珍玩數事並敕諭國王歸咎使臣不遵禮節謝宴英使怏怏去七月降革蘇楞額和世泰廣惠等有差道光元年復申鴉片煙禁七年廣東巡撫朱桂楨毀英商公局以其侵佔民地也十三年英罷商公司西洋市廣東者十餘國皆散商惟英有公司公司與散商交惡是年遂散公司聽商自運而第征其稅明年粵督盧坤驟聽洋商言以英公司雖散而粵中不可無理洋務之人遂奏請飭英仍派遣大司大班來粵管理貿易英王乃遣領

事律勞卑來粵尋代以義律義律讓在粵設審判署理各洋交涉訟事其貿易仍聽散商自理十六年定食鴉片煙罪初英自道光元年以後私設貯煙大船十餘隻謂之躉船又省城包買戶謂之窩口由窩口兌價銀於英館由英館給票單至躉船取貨有來往護艇名曰快蟹礮械畢具太常寺卿許乃濟見銀輸出歲千餘萬奏請弛煙禁令英商仍照藥材納稅入關交行後只許以貨易貨不得用銀購買以示限制已報可旋因疆臣奏請嚴販賣吸食罪名加重至死而私販私吸如故十八年鴻臚寺卿黃爵滋請嚴吸食罪行保甲連坐之法且謂其禍烈於洪水猛獸疏上下各督撫議於是請禁者紛起湖廣總督林則徐奏尤剴切言鴉片不禁絕則國日貧民日弱十餘年後豈惟無可籌之餉抑且無可用之兵帝深然其言詔至京面授方略以兵部尙書頒欽差大臣關防赴粵東查辦明年春正月至粵東與總督鄧廷楨會申煙禁頒新律以一年又六月爲限吸煙罪絞販煙罪斬時嚴捕煙犯洋人泊零丁洋諸躉船將徙避則徐咨水師提督各營分路扼守令在洋躉船先繳煙方許開艙又傳集十三行商

人等令諭各商估煙土存儲實數並索歷年販煙之查願願地二人查願遁走
義律託故回澳門及事亟斷水陸餉道義律乃使各商繳所存煙土凡二萬二
百八十三箱則徐命悉焚之而每箱償以茶葉五觔復令各商具永不售賣煙
土結於是煙商失利遂生觖望義律恥見挫辱乃鼓動國人冀國王出于預國
王謀於上下議院僉以此類貿易本于中國例禁其曲在我遂有律士丹者上
書求禁並請禁印度栽種又有地爾洼作鴉片罪過論以爲既壞中國風俗又
使中國猜忌英人反礙商務然自燒煙之信傳入外洋茶絲日見翔踊銀利日
長義律遂以爲鴉片興衰實關民生國計時林則徐令各洋船先停洋面候查
必無携帶鴉片者始許入口開船各國商俱如命獨義律抗不遵命謂必俟其
國王命定章程方許貨船入口而遞書請許其國貨船泊近澳門不入黃埔則
徐嚴駁不許又禁絕薪蔬食物入澳義律率妻子去澳寄居尖沙嘴貨船乃潛
招其國兵船二又取貨船配以礮械假索食突攻九龍山參將賴恩爵礮沈其
雙桅船一餘船留澳仔者亦爲水師攻燬義律求澳人轉圍願遵新例惟不肯

即交毆斃村民之犯又上書請毋逐尖沙嘴貨船且俟其國王之命水師提督關天培以不交犯擲還其書冬十月天培擊敗英人義律遁十一月罷英人互市英貨船三十餘艘皆不得入又搜捕偵探船日數起英商人人怨義律義律不得已復遣人投書乞恩請仍回居澳門林則徐以新奉旨難驟更復嚴斥與之絕而英貨船皆泊老萬山外洋不肯去惟以厚利啖島濱亡命漁舟蜚艇致薪蔬且以鴉片與之市是月廣東增嚴海防二十年春正月廣東游擊馬辰焚運煙濟英匪船二十餘夏五月林則徐復遣兵逐英人於磨刀洋時義律先回國請益兵其國遂命伯麥率兵船十餘及印度兵船二十餘來粵泊金星門則徐以火艘乘風潮往攻英船避去英人見粵防嚴謀擾閩敗於廈門六月攻定海殺知縣姚懷祥等事聞特旨命兩江總督伊里布爲欽差大臣赴浙督師七月則徐遣副將陳連升游擊馬辰率船五艘攻英帥士密於磨刀洋馬辰一艘先至乘風攻之破破其船八月義律來天津要撫時大學士琦善任直隸總督義律以其國巴里滿衙門照會中國宰相書遣人詣大沽口上之多所要索一

索貨價二索廣州廈門福州定海各港口爲市埠三欲敵體平行四索犒軍費五不得以外洋販煙之船貽累岸商六欲盡裁洋商浮費琦善力持撫讓旋宴其曾目二十餘人許陳奏遂入都面陳撫事乃頒欽差大臣關防命琦善赴粵東查辦是月免浙江巡撫烏爾恭額以失守海疆又英人投書不受故也義律既起旋過山東巡撫託渾布具犒迎送代義律奏事謂義律恭順且感皇上派欽差赴粵查辦恩能兩廣總督林則徐上諭切責以怡良暫署總督事會議律南行過蘇復潛赴鎮海時伊里布駐浙接琦善議撫咨遣家丁張喜赴英船犒師英水師統領伯麥踞定海數月聞撫事定聽洋艘四出游奕至餘姚有土人誘其五桅船入攔淺灘獲黑白洋人數十伊里布聞之飛檄餘姚縣設供張委員護入粵冬十月琦善抵廣州尋授兩廣總督義律請撤沿海諸防虎門爲廣州水道咽喉水師提督駐焉其外大角沙角二礮臺燒燬後益增戍守師船火船及礮艇扒龍快蟹悉列口門內外密布橫樞暗樁至是裁撤殆盡義律遂日夜增船檣造攻具首索煙價繼求香港且行文趣琦善速覆十二月五日突攻

沙角礮臺副將陳連升等兵不能支遂陷皆死之英人又以火輪三板赴三門口焚我戰船十數艘水師亦潰英人乘勝攻大角礮臺千總黎志安受傷推礮落水潰圍出礮臺陷英人悉取水中礮分兵戍守於是虎門危急水師提督關天培總兵李廷钰游擊馬辰等守靖遠威遠礮臺僅兵數百遣弁告急不應廷钰至省泣求增兵以固省城門戶琦善恐妨撫議不許文武僚屬皆力請始允遣兵五百義律仍挾兵力索煙價及香港二十一年春正月琦善以香港許英而未敢入奏乃歸浙江英俘易定海義律先遣人赴浙繳還定海續請獻沙角大角礮臺以易之琦善與訂期會於蓮花城義律出所定貿易章程並給予香港全島如澳門故事皆私許之既而琦善以義律來文入奏帝怒不許罷琦善並伊里布命宗室奕山爲靖逆將軍尙書隆文湖南提督楊芳爲參贊大臣赴粵勦辦時義律以香港已經琦善允給徧諭居民以香港爲英屬埠又牒大鵬營副將令撤營汛粵撫怡良聞之大駭奏聞帝大怒命籍琦善家遂下詔暴英人罪促奕山等兼程進會各路官兵進勦尋以兩江總督裕祿爲欽差大臣赴

浙視師時定海鎮海等處英船四出游奕裕謙遣兵節次焚勦並誅其曾目一人二月英人犯虎門水師提督關天培死之乘勝薄烏涌省城大震十三日參贊楊芳抵粵各路官兵未集而虎門內外舟師悉被燬楊芳議以堵爲勦使總兵段永福率千兵扼守東勝寺陸路總兵長春率千兵扼鳳凰岡水路英人率師近逼雞徑鳳凰岡官兵擊退仍乘潮深入飛礮火箭並力注攻會美領事以戰事礙各國商船進口赴營請進埔開艙兼爲英人說和謂英人繳還定海惟求通商如舊並出義律書有惟求照常貿易如帶違禁物即將貨船入官之文時定海師船亦至粵楊芳欲藉此緩兵退敵遂與怡良聯銜奏請帝以其復踵請撫故轍嚴旨切責不許三月詔林則徐會辦浙江軍務尋復遣戍新疆四月奕山以楊芳隆文等軍分路夜襲英人不克英人遂犯廣州城不得已仍讓歎義律索煙價千二百萬美商居間許其半議既定奕山奏稱義律乞撫求許照舊通商永不售賣鴉片將所償費六百萬改爲追交商欠撫議既定英人以撤四方礮臺兵將擾佛山鎮取道泥城經蕭關三元里里民憤起號召各鄉壯勇

四面邀截英兵死者二百餘殪其渠帥伯麥等義律馳援復被圍亟遣人突出告急於廣州知府余葆純葆純馳往解散翼義律出圍登舟免時三山鄉民亦擊殺英兵百餘佛山義勇圍攻英民於龜岡礮臺殲英兵數十又擊破應援之杉板船新安亦以火攻燬其大兵船一餘船遁義律牒總督示諭衆始解散義律受挫久之始變計入閩攻廈門再陷復統兵攻定海總兵葛雲飛等戰沒裕謙以所部兵赴鎮海方至而英人自蛟門島來攻時鎮海防兵僅四千提督余步雲與總兵謝朝恩各領其半步雲違裕謙節制不戰先走英遂據招寶山俯攻鎮海陷之裕謙赴水死謝朝恩亦戰歿英人乘勝據甯波八月英人攻鶴籠爲臺灣道姚瑩所敗九月命大學士宗室奕經爲揚威將軍侍郎文蔚副都統特依順爲參贊大臣赴浙以怡良爲欽差大臣赴閩會辦軍務二十二年春正月大兵進次紹興將軍參贊定議同日分襲甯波鎮海豫洩師期及戰官軍多損失是月姚瑩復敗英人於大安二月英人攻慈谿營金華協副將朱貴及其子武生昭南督糧官即用知縣顏履敬死之是月起用伊里布先是伊里布解

任並逮其家人張喜入都遣戍至是浙撫劉韻琦請起用報可旋以耆英爲杭州將軍命臺灣設防夏四月英人犯乍浦副都統長喜同知韋逢甲等戰死時伊里布已來浙卽命家人張喜見英會告以撫事有成令先退至大洋卽還所俘英人英人如約遂以收復乍浦奏聞英人連陷寶山上海江南提督陳化成等死之遂犯松江陷鎮江殺副都統海齡准揚鹽商懼甚路英師乞免秋七月犯江寧英火輪兵船八十餘艘溯江上自觀音門至下關時耆英方自浙啟行伊里布亦奉詔自浙馳至遣張喜詣英船道意英人要求各欸一索煙價商欠兵費銀二千一百萬一索香港爲市埠並通商廣州福州廈門寧波上海五口一英官與中國官用敵體禮餘則劃抵關稅釋放漢奸等欸未請鈐用國寶會耆英至按欸稍駁詰英突張紅旗揚言今日如不定議詰朝攻城遂卽夜覆書一如所言翼日遣侍衛咸齡布政司黃恩彤署紹台道鹿澤長往告各欸已代請俟批回卽定約奏上許之時耆英伊里布牛鑑以將修好遣張喜等約期相見馬利遜請以本國平行禮見耆英等遂詣英舟與璞鼎查等用舉手加額禮

訂約復親具牛酒犒師畫諾於靜海寺是爲白門條約自此煙禁遂大開矣而英猶以臺灣殺英俘爲總兵達洪阿兵備道姚瑩罪來詰不得已罷之十二月以伊里布爲欽差大臣赴廣東督辦通商事二十三年夏伊里布卒詔耆英往代先許英廣州通市初英粵東互市章程各國皆就彼掛號始輸稅法人美人皆言我非英屬不肯從遂許法美二國互市皆如英例二十四年英人築福州烏石山英領事官見浙閩總督劉韻珂請立商埠欲於會城內外自南臺至烏石山造洋樓阻之值交還欠欵照江寧約已付甲辰年銀二百五十萬應將舟山鼓浪嶼退還中國英公使藉不許福州城內建樓事不與交還屢經辯論始允退還鼓浪嶼然執在彼建屋如故福州既得請遂冀入居廣州城廣州民憤阻揭帖議劫十三洋行英曾逸去入城之議遂不行二十六年秋七月英人還舟山十二月請與西藏定界通商以非條約所載不許二十八年英曾文翰復請入廣州城互市總督徐廣縉拒之越日英舟闖入省河廣縉單舸往諭省河兩岸義勇呼聲震天文翰請仍修舊好不復言入城事咸豐元年文宗嗣位英

人以火輪船駛赴天津稱來弔大行皇帝喪直隸總督以聞命却之三年洪秀全陷江寧英以輪船駛至江寧迎入城與通款英人言不助官亦不助洪四年劉麗川據上海作亂初英人阻官軍進兵江督怡良等詰之既而英人欲變通貿易章程聯法美二國請於粵督葉名琛不許遂赴上海見蘇撫吉爾杭阿九月赴天津帝命長蘆鹽政崇綸等與相見拒其遣使駐京諸條久之始去六年秋九月英人巴夏里致書葉名琛請循江寧舊約入城不省英人攻粵城不克遂復請釋甲入見亦不許冬十月攻虎門橫檔各礮臺又爲廣州義勇所却乃馳告其國於是簡其伯爵額爾金來華擬由粵入都先將火輪兵船分泊澳門香港以俟額爾金至粵初謀入城不可與水師提督領事等議款牒粵中官吏俟其復書定進止名琛置不答七年冬十二月英人遂合法美俄攻城城陷執名琛去因歸罪粵中官吏上書大學士裕誠求達裕誠覆書令赴粵與新命粵督黃宗翰商辦不省八年夏四月聯兵犯大沽連陷前路礮臺帝命科爾沁親王僧格林沁率師赴天津防勦京師戒嚴帝命大學士桂良吏部尙書花沙納

赴天津查辦復起用耆英借往耆英至往謁英使不得見擅自回京賜自盡英有里國太耆嘉應州人也世仰食外洋隨英公使額爾金爲行營參贊聞桂良至即持所定新議五十六條要桂良允許桂良辭之津民憤與英人鬪擒里國太將殺之桂良譚廷襄恐誤撫局亟遣人釋里國太送回舟時廷臣交章請罷撫議以疆事棘不得已始命桂良等與定和約五十六款六月遣桂良花沙納巡視江蘇籌議諸國通商稅則冬十月定通商稅則時英人以條約許增設長江海口商埠欲先察看沿江形勢定約後即遣水師領事以輪船入江湖流至漢口踰月而返是年議通商善後事時各國來天津換約均因桂良原議改由北塘海口入獨英船先抵天津海口俄人繼之突背前約闖入大沽口直隸總督恒福遣人持約往令改道不聽九年夏五月英船十餘艘駛至灘心越日豎紅旗挑戰拽倒港口鐵鎖鐵樁遂逼礮臺開礮轟擊時僧格林沁防海口開礮應之沈燬其數船英人復以步隊接戰又敗之十年夏六月復犯天津海口直隸提督樂善守北岸礮臺拒戰中礮死時僧格林沁尙守南岸礮臺詔罷兵議

撫乃自天津退軍張家灣英遂乘勢陷天津尋復遣僧格林沁進軍通州帝仍命大學士桂良往天津讓撫桂良抵津牒洋人商和局英公使額爾金參贊巴夏里請增軍費及在天津通商並請各國公使帶兵入京換約桂良以聞嚴旨拒絕仍命僧格林沁等守通州八月英人犯通州帝命怡親王載垣赴通讓欽時桂良及軍機大臣穆蔭皆在英使額爾金遣其參贊巴夏里入城議和請循天津原議並約法使會商翼日宴於東獄廟巴夏里起曰今日之約須面見大皇帝以昭誠信又曰遠方慕義欲觀光上國久矣請以軍容入王憤其語不遜密商僧格林沁擒送京師兵端復作時帝適秋獵自行在詔以恭親王奕訢爲全權大臣守京師並詔南軍入援時團防大臣大學士周祖培尙書陳孚恩等議籌辦團練城守事恭親王桂良駐城外而英師已薄城下焚圓明園英人請開安定門入與恭親王面議和乃約以次日定和議而釋巴夏里於獄遣恒祺送歸九月和議成增償兵費八百萬並開天津商埠復以廣東九龍司地與英人是年用里國太幫辦稅務十一年春二月英人始立漢口九江市埠均設洋

關九月總署因與英使卜魯士議暫訂長江通商章程十二款納稅章程五款是月交還廣東省城卜魯士始駐京同治元年粵賊陷蘇松常太各城各國懼擾上海商務謀自衛英水師提督何伯隨法美攻勦復青浦甯波諸處捷聞嘉獎九月與英人續訂長江通商章程二年春以英將戈登統常勝軍權授江蘇總兵四年秋七月英交還大沽礮臺五年春正月與英人議立招工章程七年十二月臺灣英領事吉必勳因運樟腦被阻牽及教堂洋將茄當踞營署殺傷兵勇焚燒軍火局庫索取兵費事聞詰英使久之始將吉必勳撤任未幾英兵船在潮州又有毀燒民房殺死民人事幾釀變八年九月與英換新約英使阿禮國請朝覲不許九年請辦電綫鐵路不許既而請設水底電綫於中國通商各口許之十年請開瓊州商埠先是同治七年修新約英使阿禮國允將瓊州停止通商以易溫州至是英使威妥瑪與法俄美布各國咸以爲請允仍開瓊州十二年穆宗親政始覲見初因覲見禮節中外不同各國議數月不決英持尤力至是始以鞠躬代拜跪惟易三鞠躬爲五號爲加禮光緒元年正月乙卯

英繙譯官馬嘉理被戕於雲南先是馬嘉理奉其使臣威安瑪命以總署護照赴緬甸迎探路員副將柏郎等偕行至雲南騰越廳屬蠻允土司地被戕時岑毓英以巡撫兼署總督威安瑪疑之聲言將派兵自辦帝派湖廣總督李瀚章赴滇查辦威安瑪遂出京赴上海於是有命李鴻章丁日昌會同商議之舉威安瑪至津見李鴻章以六事相要鴻章拒之政府派前兵部侍郎郭嵩燾使英葆楨以英人築路租界外違約飭停工至是威安瑪遣其漢文正使梅輝立赴滬商辦鴻章乃與約令英商停工而中國以原價購回自辦初上海既通商租界內仍有釐捐局專收華商未完半稅之貨至是威安瑪欲盡去釐捐局界內中國不得設局征收釐稅鴻章請政府勿許二年五月諭馬嘉理案疊經王大臣與英使威安瑪辯論未洽命李鴻章商辦早結六月命鴻章爲全權大臣赴煙台與威安瑪會商相持者逾月議始定七月鴻章奏稱臣抵煙台威安瑪堅求將全案人證解京覆訊其注意尤在岑毓英主使臣與反復駁辨適俄德美

法日與六國使臣及英德水師提督均集煙台往來談讌因於萬壽聖節邀請列國公使提督至公所燕飲慶賀情誼聯洽翌日威使始允另議辦法將條款送臣查核其昭雪演案六條皆總理衙門已經應允惟償款銀數未定其優待使臣三條一京外兩國官員會晤禮節儀制互異欲訂以免爭端一通商各口會審案件一中外辦案觀審兩條可合併參看觀審一節亦經總署於八條內允行至通商事務原議七條一通商各口請定不應抽收洋貨釐金之界並欲在沿海沿江沿湖地面添設口岸一請添口岸分作三項以重慶宜昌溫州蕪湖北海五處爲領事官駐紮湖口沙市水東三處爲稅務司分駐安慶大通武穴陸溪口岳州瑪斯六處爲輪船上下客商貨物一洋藥准在新關併納稅釐一洋貨半稅單請定劃一款式華洋商人均准領單洋商運土貨出口商定防弊章程一洋貨運回外國訂明存票年限一香港會定巡船收稅章程一各口未定租界請再議訂以上如洋藥釐稅由新關併徵既免偷漏亦可隨時加增土貨報單嚴定章程冀免影射冒騙諸弊香港妥議收稅辦法均尙於中國課

餉有益其餘亦與條約不背英使又擬明年派員赴西藏探路請給護照因不便附入滇案優待通商三端之內故列爲專條免定口岸添設口岸兩事反覆爭論乃允免定口岸僅於租界免抽洋貨釐金且指明洋貨土貨仍可抽收將來洋藥加徵稍資撥補似於大局無甚妨礙至添口岸一節總署已允宜昌溫州北海三處赫德續請添蕪湖口亦經奏准今仍堅持前議准添四口作爲領事官駐紮處所其重慶派英員駐寓總署已於八條內議准未便即作口岸聲明俟輪船能上駛時再行議辦至沿江不通商口岸上下客商貨物一節自長江開碼頭後輪船隨處停泊載人運物因未明定章程碍難禁阻英使既必欲議准似不在停泊處所之多寡要在口岸內地之分明臣今與訂上下貨物皆用民船起卸仍照內地定章除洋貨稅單查驗免釐外有報單之土貨只准上船不准卸賣其餘應完稅釐由地方官一律妥辦等語是與民船載貨查收釐金者一律只須各地方關卡員役查察嚴密耳英使先請湖口等九處臣與釐定廣東之水東係沿海地方不准驟開此禁岳州距江稍遠不准繞越行走姑

允沿江之大通安慶湖口武穴陸溪口沙市六處輪船可暫停泊悉照內地抽
徵章程臣復與德國使臣巴爾德議及德國修約添口即照英國議定辦理威
妥瑪請半年後開辦口岸租界免洋貨釐洋藥並納釐稅須與各國會商再行
開辦因准另爲一條至派員赴西藏探路一節條約既准游歷亦無阻止之理
臣於原議內由總理衙門駐藏大臣查度情形字樣屆時應由總理衙門妥慎
籌酌迨至諸議就緒商及滇案償款英使謂去冬專爲此事調來飛游幫大兵
船四隻保護商民計船費已近百萬臣謂兩國並未失和無認償兵費之例曷
其定數英使謂吳淞鐵路正滋口舌如臣能調停主持彼即擔代仍照原議作
二十萬遂定議因於二十六日將所繕會議條款華洋文四分彼此畫押蓋印
互換至滇邊通商威使面稱擬暫緩開辦求於結案諭旨之末豫爲聲明疏入
報聞鴻章仍回直督本任約成互換是爲煙台條約約分三端一曰昭雪滇案
二曰優待往來三曰通商事務又另議專案一條是年遣候補五品京堂劉錫
鴻持璽書往英爲踐約惋惜滇案也三年英窺喀什噶爾以護持安集延爲詞

陝甘總督左宗棠拒之英人欲中國與喀什噶爾劃地界又請入西藏探路皆不行是年始於英屬地星嘉坡設領事四年秋八月福建民燬英烏石山教堂英人要求償所失乃已五年英欲與中國定釐稅併徵確數總署擬仍照煙台原議條款稅照舊則釐照舊章七年十月李鴻章復與威妥瑪議洋藥加徵稅釐初洋藥稅釐併徵之議始發於左宗棠原議每箱徵銀一百五十兩其後各督撫往來商議訖無成說滇案起鴻章乃與威妥瑪議商洋藥加徵稅釐威妥瑪謂須將進出口稅同商定議進口稅值百抽十而出口稅以英商不願加稅爲辭並主張在各口新開釐稅並加通免內地釐金鴻章以欲通免釐金當於海關抽稅百二十兩須加正稅三倍如不免釐金則須增加一倍至六十兩既威妥瑪接到本國擬定鴉片加稅章程數條一釐稅併徵增至九十兩二增正稅至五十兩各口釐金仍照舊收三擬由中國通收印度鴉片而印度政府或約於每年減種鴉片或由兩國商定當減年限至限滿日停種至每石定價或按年交還或另立付價時候亦由兩國訂明其價或在香港撥還或在印度交

兌其事則官辦商辦均可四擬立專辦洋藥英商公司每箱應償印度政府一定價值應納中國國家一定釐稅至繳清此項釐稅後其洋藥在中國即不重徵印度政府約明年限將鴉片逐漸截止初威妥瑪於進口已允值百抽十至是因洋藥稅釐未定又翻又欲於各口租界外酌定二三十里之界免收洋貨釐鴻章以租界免釐載在條約業經開辦有年何得復議推廣拒之威妥瑪又請由香港設電綫達粵省其上岸祇准在黃埔輪船停泊附近之處由粵省大吏酌定九年三月上諭洋藥稅釐併徵載在煙台條約總理衙門歷次與英使威妥瑪商議終以咨報本國為詞藉作延宕威妥瑪現已回國著派出使大臣曾紀澤安為商辦如李鴻章前議一百一十兩之數併在進口時輸納即可就此定議洋藥流毒多年自應設法禁止英國現有戒煙會願以洋藥害人為恥如能乘機利導與英外部的議洋藥進口分年遞減專條逐漸禁止尤屬正本清源之計並著酌量籌辦紀澤奉旨與英外部議三年始定十一年六月奏曰臣遵旨與英外部尚書伯爵葛蘭斐爾侍郎龐斯弗德克雷等商論力爭數目

最後乃得照一百一十兩之數今年二月准彼外部允照臣議開具節略咨送臣署且欲另定專條聲明中國如不能令有約諸國一體遵照英國即有立廢專約之權臣復力爭不允載入專條彼乃改用照會詳勘所送節略即係商定約稿其首段限制約束等語緣逐年遞減之說印度部尙書堅執不允其侍郎配德爾密告臣署參贊官馬格里云照專條辦法印度每年已減收英金七十萬餘鎊中國欲陸續禁減洋藥入口惟有將來陸續議加稅金以減吸食之人而不能與英廷豫定遞減之法遂未堅執固爭而請外部於專案首段加入於行銷洋藥之事須有限制約束一語以聲明此次議約加稅之意而暗伏將來修約議加之根至如何酌定防弊章程設立稽徵總口煙台條約第三端第五節固已明定要約臣此次所定專條第九款又復聲明前說將來派員商定自不難妥立章程嚴防偷漏其餘各條核與疊准總理衙門函電吻合旋承總署覆電照議畫押時適英外部尙書葛蘭斐爾退位前尙書侯爵沙力斯伯里推爲首相仍兼外部六月三日始據來文定期七日畫押臣屆期帶同參隨等員

前往外部與沙力斯伯里將續增條約專條漢文英文各二分互相蓋印畫押按此次所訂條約除第二條稅釐併徵數目恪遵諭旨議得百一十兩外又於第五條議得洋藥於內地拆包零售仍可抽釐是內地並未全免稅捐將來若於土煙加重稅釐以期禁滅則洋藥亦可相較均算另加稅釐臣於專條中並未提及土煙加稅之說以期保我主權疏入得旨允行旋兩國派員互換是爲煙台續約秋八月英人議通商西藏是歲英窺緬甸踞其都滇督岑毓英奏請設防旋遣總兵丁槐率師往騰越備之中國以緬甸久爲我屬電曾紀澤向英外部力爭令存緬祀立孟氏英外部不認緬爲我藩屬而允立孟氏支屬爲緬甸教王不得與聞政令紀澤未允外部尙書更易教王之說亦置諸不議矣既英署使歐格訥以煙台約有派員入藏之文堅求立見施行總署王大臣方以藏衆不許西人入境力拒所請會歐格訥以緬約事自詣總署言緬甸前與法私立盟約是以興師問罪今若重立緬王則法約不能作廢故難從命今欲依緬甸舊例每屆十年由緬甸長官派員赴京而勘定滇緬邊界設關通商以踐

前約王大臣等以但言派員赴京並未明言貢獻辨爭再四始改爲呈進方物循例舉行而勘界通商則皆如所請歐格訥始允停止派員入藏藏印通商仍請中國體察情形再行商議議既定總署因與歐格訥商訂草約四條得旨允行十二年九月請英退朝鮮巨文島不聽十月議瓊州口岸英領事以條約有牛莊登州台灣潮州瓊州府城口岸字樣謂城與口岸皆口岸中國以英約十一款雖有瓊州等府城口岸字樣而煙台續約第三端聲明新舊各口岸除已定有各國租界應無庸議云云英約天津郡城海口作通商埠紫竹林已定有各國租界城內亦不作爲口岸以此例之則瓊州海口係口岸瓊州府城非口岸也十三年秋七月與英換緬約於倫敦十四年春英人麻葛葛督兵入藏藏人築卡禦之爲英屬印兵所逐藏人旋又攻哲孟雄境之日納宗又敗先是藏地國初歸附自英侵入印度後藏遂與英鄰乾隆年英印度總督曾通使班禪求互市班禪謂當請諸中國議未協而罷哲孟雄者藏印間之部落也道光間英收爲印屬及煙臺訂約有派員入藏之說而藏人未知遂築礮臺於邊外之隆吐山

冀阻英兵使不得前英人以爲言帝諭四川總督劉秉璋飛咨駐藏大臣文碩
幫辦大臣升泰傳各番官嚴切宣示迅撤卡兵於時升泰尙未抵任文碩未賅
交涉輒以拒英護藏覆奏於是嚴旨切責以長庚代之仍有旨催令升泰赴藏
傳齊番官諭以上年與英人訂議緩辦通商正朝廷護持黃教覆庇藏番代籌
一永保安全之至計但令迅速撤卡印督已言明彼決不越藏中定界熱勒巴
拉山嶺一步彼此未經開戰無論此地屬藏屬哲將來尙可從容辨論時十四
年正月也寄諭未至英兵已進攻隆吐毀其壘藏番悉潰乃欲藉通商以緩師
文碩復左右之竟以藏人與英自行立約入奏四月丁亥諭曰印藏通商一事
英人約定并不催辦此次開衅與通商絕無干涉文碩始終不明機要乃欲藉
通商爲轉圜不思藏爲小國屬地豈有聽其自行與人立約之理升泰文碩接
奉此旨即傳集番官諭以事須稟明駐藏大臣具奏由總理衙門核定候旨遵
辦五月庚申又諭曰使英大臣劉瑞芬電稱印督近又函達藏官但令藏衆退
回原界便可仍舊和好絕不欲侵入藏地致礙兩國睦誼向來藏務專歸商上

第穆呼圖克圖人尙和平曉事現在掌辦商上責有專歸升泰接奉此旨即傳諭第穆令其妥爲了結未幾升泰抵任受事九月奏言藏番自作不靖肇起兵戈所有隆吐山南北本皆哲孟雄地英人雖視爲保護境內實則哲孟雄布魯克巴皆西藏屬藩每屆年終兩部長必與駐藏大臣呈遞賀稟駐藏大臣循例優加賞犒唐古特自達賴喇嘛以下均有額定禮物商上亦回賞緞疋銀茶與兩部復書草稿必早送駐藏大臣批准始行繕覆哲布兩部遇有爭訟亦稟由藏官酌派漢番官辦理此哲布本爲藏地屬番之實在情形也兩部長於光緒二年曾各遞番字稟以英人有窺伺藏地之心請早爲設法辦理雖經前西藏糧員四望關通判周濛帶同戴琮札喜達結往辦祇取哲孟雄空結一紙敷衍了事並不妥籌善後貽悞邊疆其禍實自此始嗣後哲夷知藏番並無遠慮始一意與英人交接又復貪利取租聽英人修路直至捻納迄今仍稱租界又藏中自失藩籬之始末也藏人不知優待屬藩哲部偶受欺凌不爲申理此時漸覺英人有徇己之心忽又攘奪哲地以爲己有更揚言哲夷私結英人屢議起

兵攻伐哲夷內不自安則益句結英人以圖自保此又藏印交兵之所由來也
藏人自四月十三日戰敗之後不思設法弭患又復添調各路土兵分由小道
至帕克里沿途騷擾良民大受荼毒番官管餉又多減刻人有怨言軍無鬥志
除向隸戴琿之兵三千及工布兵數百人差可用命餘則悉係烏合現筭帕隘
以外者一萬餘人分布各口又數千人一旦敗北譁潰則數千里臺站伏莽增
多此內患之堪虞者也近時開導之難實因曩時初與外人交涉商上辦事諸
員邀三大寺僧衆以護教爲名共立誓詞云藏地男女不願與洋人共生於天
地此後藏中男女老弱有違此誓即有背黃教人人得而誅之此本不肖之徒
爲衆衆抗官之謀三大寺僧衆亦藉此干預政事今事機危迫特旨到藏第穆
亦知凜畏無如遽違初議即禍在目前雖掌辦商務之尊恐亦不免自危其噶
布倫以次更不待言窺其情形似非背城一戰難望轉機此臣探其隱衷而言
非藏番等自有此語也此時兵尙未撤委員不便前往且委員至彼辦理界務
應與英國何人會議應請飭詢英使由總署知照藏中庶免隔閡近年藏番異

常刁悍今自開兵衅尙不自知悔悟實難姑容第藏衛距川過遠餉絀兵單無事不形掣肘臣萬不敢不出之審慎籌慮萬全相機駕馭冀紓朝廷西顧之憂是月丁卯又奏臣於五月二十六日抵藏第穆與大小番官僧俗公同遞稟譯其情詞總以隆吐之南日納宗爲藏界藏人設卡係在境內英人無端恃強動兵侵地爲言臣以經界爲地方要政從前豈無案牘乃派員將新舊各案卷概行檢閱始尋出乾隆五十九年前大臣尙書和琳內閣學士和瑛任內奏設鄂博原案一卷注明藏內界址係在距帕克里三站之雅拉支木兩山設有鄂博又有春丕日納宗兩處上年雖係藏界乾隆五十三年廓番用兵哲孟雄被廓夷追過藏曲大河哲部窮蹙達賴喇嘛始將日納宗地賞給哲部究理原派委員西藏遊擊張志林原稟即聲叙日納宗不應作爲藏界只在雅拉支木兩山設立鄂博稟詞甚爲明晰此圖惜已佚又覓得舊圖一張並注明納蕩一地乃哲孟雄邊境藏圖南面極邊界綫之上亦繪有雅拉山是雅拉山屬藏地南界至藏人設卡之隆吐山攷之舊圖實無此名以英人所云日納宗在隆吐北

數十里而藏番新圖則日納宗又在噠吐之南顯係藏人多繪此一段飾稱藏界臣既考察明確即以原卷舊圖發交開導委員轉給藏番閱看番人雖有愧色然終以日納宗本屬藏地從前雖賞給哲夷今哲夷已歸英屬應卽收回自筦旋奉電傳寄諭臣卽面授第穆臣深慮第穆使將屯兵先行撤入帕克里並札飭哲布兩部長親赴英軍告以藏人畏倂故兵難先撤印兵亦宜克踐前言彼此約期同日撤退仍由臣致信英官促其速撤忽又得報英人於六月二十八日添兵九百餘名又益以大礮六門第穆旋亦稟英人屢次攻撲我營且廓爾喀前王子果爾雜捻曾出奔印度今亦由印帶兵五百名前來助戰聞已過大吉嶺是以未敢撤兵伏乞飭下總署詳告英使轉電印督約期撤兵並飭印兵毋得再動疏入奉上諭升泰所陳頗中肯綮劉瑞芬八月二十八日電稱印兵在熱勒巴拉山近處與藏兵攻戰藏兵傷亡數百印兵追入徵畢山岔九月十五日電稱英外部照覆云來攻納蕩之英軍統領拉哈瑪已遵印度政府之諭不可占據藏地故追入徵畢後卽退回印督又報告其政府謂駐藏大臣

將以西歷十月三日山拉薩前赴邊界已派政事官保爾前往會晤目前升泰想已接晤保爾藏哲界址當已查明印督又有甚望速了之語著即熟商妥辦升泰先使江孜守備蕭占先馳往開導又以知縣秀蔭繼之藏兵之敗也英兵追至仁進岡將盡焚山上下民舍會占先至見英將力爭乃退屯對邦而促升泰前往會議數日復進據姑布升泰十一月至與英員保爾相見於對邦議經月未就乃奏言英人戰勝而驕必欲諸事議妥始允撤兵現議哲孟雄事不下十次保爾必欲將哲爲英屬註明條約而畫明利拉山爲界即歷次奏牘所謂熱勒巴拉山也臣議以印督前言藏衆退回原界仍守二年以前情形不在隆吐山駐兵便可照舊辦理絕不侵入藏界等語折之保爾則謂此語當在未開戰前戰衅既開自當另議通商一事英人開來條款直欲到藏貿易臣百端辨說始允退至江孜又答以萬不能行則又意在帕克哩帕隘乃藏南門戶其險要在山要之格林卡若至帕克哩則已在高原爲廓爾喀哲孟雄布魯克巴三部通衢目前開導藏番通商必在界外始可期其遵從是以臣堅未允許保爾

意甚佛然臣惟有平心靜氣婉與商榷冀紓目前之急是年英定華工往澳大利亞例限英君主維多利亞登位五十年中國遣使致賀十五年升泰復與英人接議通商分界久不決十六年二月初旨派總務司赫德之弟赫政赴藏協商藏印約事升泰奏言撤兵藏番已願遵旨所難者分界通商兩大端耳臣自到邊哲部長之母率其親族頭目來營具稟云英人昔年立約曾經議明無論如何不得逾日喜曲河一步哲部租地與英每年應收租費洋銀十二千圓英人分毫未給此次印藏搆兵以致殃及實不願再歸英屬臣維哲孟雄本屬小邦僻在極邊本年印藏用兵被英人掠取全土復遷其部長安置印度噶倫綑之地而以重兵駐守扛多即部長平時治所也流離轉徙情實可矜是以此大會議但許其保護而必爭照舊兩字使藏人不至咎臣辦理邊事失去屬藩並可藉此羈縻布魯克巴至布魯克巴地大物博民俗強悍其地數倍哲孟雄實爲前藏屏蔽西人呼爲布丹國上年曾經入貢其部長向無印信亦無封號臣此次到邊其部長派兵千七百人來營效力臣方飭藏兵遣撤豈可留此多人

致貽口實是以優給賞賚勉以大義飭令速回許事後爲之代懇天恩該部人
歡忻鼓舞而去赫政既抵藏升泰與英官開議保爾雖奉命印督爲讓約專員
然不得自主事事仍請命印督藏番不願與英接壤必問哲孟雄於中乃可定
界英既幽哲曾於噶倫綱直欲收入印度幅員之內藏人聞之益憤升泰嚴飭
番官僧俗毋率行干預哲事而亟使赫政勸阻英官勿遽更易哲曾使藏人有
所藉口藏哲舊界本在雅納支木兩山間其後商販往來另闢捷徑於是有所
謂咱利孔道者即熱勒巴拉嶺之支麓也升泰議即咱利山立石畫分藏哲之
界其印哲舊界在日喜河者亦擬仍舊而於條約註明藏番不願通商初指對
邦附近地爲商埠後始議定後藏之亞東於其地修建關卡設漢官治之藏番
甫首肯而英官又遷延不遽決升泰亟奏請飭總署促英使迅速議約總署王
大臣旋擬四條與英使華爾身籌商久之始議定八款總署乃上奏謂第一款
藏哲以咱利山一帶山巔爲界第二款哲地歸英保護第三款兩邊各無犯越
其餘綏議各條善後應辦事宜儘可徐與商榷彼此派員定議請簡派升泰爲

全權大臣與英員先行畫押奉旨俞允是歲秋七月出使大臣薛福成與英外部互換於倫敦是為中英會議藏印條約是年德宗大婚英派使臣華爾身齋英主維多利亞國書致賀並自鳴鐘一座上刻祝辭云日月同明報十二時吉祥如意天地合德慶億萬年富貴壽康旋命駐使薛福成赴英外部傳旨致謝并遞國書是年英開重慶商埠十七年春正月換約限滿前駐藏大臣升泰遣員黃紹勳張昉及總務司赫政與英印督蘭士丹所派之保爾在大吉嶺會議各擬辦法保爾欲在仁進岡入藏一百五十餘里之法利城即帕克里設關通商並俟十年後再定入口貨稅升泰執定十二年條欵藏印邊界通商由中國體察情形之語辯駁久不決十八年夏六月復與保爾商議辦法九欵續欵二條定於交界之咱利山下亞東境內為英商貿易所商上等復懷疑慮堅請於二欵內註明不得擅入關內字樣又請禁印茶運藏一再與英使華爾身辯論仍不決至十九年五月總理衙門奏現據赫德稱印度已將辦法九欵更改商訂最緊要之第二欵內註明英商在亞東貿易自交界至亞東而止第四欵內

註明進出口稅俟五年期滿酌定稅則至印茶一項現議開辦時不即運藏俟五年限滿方可入藏銷售應納之稅不得過華茶入英納稅之數此外各款均照升泰所擬辦理臣等查中英通商稅則茶葉每百斤徵銀二兩五錢而洋商運華茶至英每百斤徵銀十兩現在先與議定如印茶入藏應照華茶入英每百斤稅銀十兩磋商經年始克就範竊思藏約未結三端自十七年開議至今已屆三年之久始得印藏兩情翕然允協即可就此收束以綏邊圉是爲續議中英會議藏印條款是年十月在大吉嶺互換既又與英議滇緬界務初曾紀澤與英議約英許中國稍展邊界擬予以潞江以東南掌擇人之地既紀澤又向英外部要求入募之地不允英外部侍郎克奮謂英廷已飭駐緬之英官勘驗一地允中國立埠設關收稅有另指舊入募之說在入募東二三十里紀澤因與外部互書節略存卷暫停不議旋受代回華至是出使大臣薛福成見英人與暹羅勘界并有創築鐵路通接滇邊之訊恐分界通商事宜不早籌議臨時必受虧損於是上書請與英人提議及福成往促踐前議英以公法爲解謂

西洋公法議在立約之後不可不遵議在立約以前不能共守蓋不認讓中國展邊界及以大金沙江爲公共江八募近處勘地中國立埠設關三端薛福成以英既翻前議因思野人山地綫亘數千里不在緬甸轄境之內復照外務部請以大金沙江爲界江東之境歸滇而印度總督不允出師蓋邊外之昔馬攻擊野人以示不願分地之意又欲借端停商全約福成仍促速議久之英始允將久淪於緬之漢龍天馬兩關還中國又久之始允讓所據之鐵壁關惟虎踞關英人以深入彼境七八十里與八募相近不允讓至於設關拒尤力福成以英既不允我地則英所得於我之權利亦應作廢相持甚久始就滇境東南商定於孟定橄欖壩西南邊外讓一地曰科干又自猛卯土司邊外抱括漢龍關在內作一直綫東抵潞江麻栗壩之對岸止劃歸中國約計八百英方里又車里孟連土司所屬鎮邊廳係爲兩屬亦允全讓並野人山毗連之昔馬亦允讓至此界務告一結束而商務大金沙江行船八募立埠設關英仍不允福成久與爭論始於行船一事於約中另立一條不許他國援例而設關仍不肯通

融惟約中於英人所得權利如緬鹽不准運入滇境英關暫不征收貨稅領事
僅設一員限一定駐所商貨僅由二路不准開埠英亦無詞遂於二十年正月
二十四日在倫敦定約共二十條一二三四劃定各段界綫五中國不再索問
永昌騰越邊界外隙地英國於北丹泥及科干照所劃邊界讓與中國孟連江
洪之地亦歸中國惟未定議前不得讓與他國八各貨物分別應稅不應稅十
十一分別各貨物准販運不准販運十三中國派領事駐仰光英國派領事駐
蠻允十五定交逃犯例十七定中英民在兩國界內相待最優例又專條內各
條款僅用於兩國所指屬地不能用於別處是爲中英續議滇緬界務商務條
款是年又與英議接滇緬邊界陸路電綫條約尋又議藏印條款二十一年夏
中日和議既成法索雲南普洱徼外猛烏鳥得兩地英使歐格訥以兩地屬緬
江洪指爲違約欲中國將八募北野人山地由薩伯坪起東南到盞達西南順
南碗河折向瑞麗江循江至猛卯向南至工隆八關科干皆在內讓歸英不許
英忽請允西江通商再議野人山地許之復要求在肇慶梧州桂林潯州南甯

五府設立領事佛山高要封川南新城等處停泊輪船由廣州澳門出入中國以野人山地減索無幾而通商口岸太多且桂林在北江之北潯州南甯在藤江甯江上游並非西江豈能強索阻止之英外部又以北丹尼科干兩地原屬緬爲前薛福成定界時誤畫入華求索回又請於騰越順甯思茅三處設領事及緬甸現有及將來續開之鐵路接入中國又請援照俄法條約利益於新疆設領事再三駁論始允將新疆設埠及援照俄法利益一節刪去滇緬接路一節改爲俟中國鐵路展至緬界時彼此相接滇界領事一節改爲將已設之檳允領事改駐或順甯或騰越一處其思茅領事係援利益均霑之例非英獨創其野人山界綫改爲南坎一處作爲永租餘俟兩國派員勘定惟西江通商一節允至梧州而止梧州之東祇開三水縣城江根墟兩地商船由磨刀門進口其由香港至廣州省城本係舊約所許仍限江門甘竹肇慶德慶四處遂定議立中緬條約附款時二十三年正月也是年英主維多利亞在位六十年命張蔭桓前往致賀二十四年四月議展香港界址至九龍城租期九十九年五月

英租威海衛初威海爲日本軍占領英人致書日相伊藤博文願代繳償款要求早撤兵會我償款繳清北洋大臣派員收回英使寶納樂遂請租借政府派慶親王奕劻尙書廖壽恒與立約文云以劉公島並在威海灣之羣島及威海全灣沿岸以內十英里之地租與英國威海衛城牆以內仍由中國自行管理又所租於英國之水面中國兵船無論在局內局外仍可享用並另備照會謂中國重整海軍船舶可泊港內請英人代爲訓練是月英領事因沙市教案照請開辦湖南通商口岸張之洞以岳州係奉准開埠尙須體察詳商辦理致總署請商緩總署擬推展兩年英使不允總署以湖南係我自開口岸與他口不同不許亦不許牽入沙案久不決二十五年五月駐漢英領事牒鄂督張之洞云本國巴管帶欲乘威拉小兵輪往洞庭湖上下游先至岳州再往湘陰長沙後往沅江龍陽常德安鄉等處張之洞以條約並無兵輪准往內地之說阻之十二月英參贊暨閣銜欲由湖南長沙取道常德永順入川過酉陽州抵重慶張之洞復阻之尋允改由宜昌入川二十六年拳匪起五月漢口英領事法磊

斯見張之洞面述沙侯電云如長江一帶布置彈壓英願以水師相助張之洞答以當與江督劉坤一力任保護不須外助力阻之時英以保全東南商務爲辭已派水師提督西摩入長江七月二十日聯軍入京英軍從廣渠門入各據地段八月英與德結保護中國商務土地條款又欲代中國理財練兵却之西摩欲派小輪入襄河探水道張之洞阻之既復議浙衛教案時湘案未結英又欲派兵輪往屢阻之是年英君主逝國書致唁皇太后復專電弔唁之二十七年既與各國議定和約大綱十二條四月英人請直隸山西停考張之洞以所請與大綱條約第十條不符辨駁久之七月始定議八月英商立德欲在川河行駛輪船沿江購地七處請地方官註冊英領事照會到鄂以條約非通商口岸無准洋商置買地基產業之條拒之十一月英使馬凱赴江鄂與劉坤一張之洞商議免釐答以去年在京與赫德籌議洋貨稅釐併征必須稅至值百抽二五方能免釐馬凱允加進口稅而不欲多加於是朝命尙書呂海寰爲辦理商約大臣侍郎盛宣懷副之並命劉坤一張之洞皆與議研商數月海寰等乃

會奏臣等奉命會辦商約英使馬凱開送約稿二十四款衆議六十餘次加稅免釐一款業經奏明允如所請此外各款均經臣等隨時會奏惟第十款內港行輪續經妥定章程第十一款通商口岸權利共議列三條馬凱自請刪除統核所索二十四款駁拒未允者七曰洋鹽進口曰內地僑居貿易曰郵政電報曰設海上律例曰整頓上海會審衙門曰口岸免釐界限曰貨物同在一河免復進口稅議定後而又刪除者一曰通商口岸利權歸入加稅免釐款內併議藉爲抵制者五曰新開口岸曰減出口稅曰三聯單曰子口單曰常關歸新關莞理商允改妥者十一曰存票曰國幣曰廣東民船輪船稅則一律曰華洋合股曰整頓珠江川江曰推廣關棧曰保護牌號曰加稅免釐曰礦務章程曰內港行輪曰米穀禁令此就馬凱原議款目分別刪改歸併者也臣之洞等復向馬凱索議彼允入約者三款曰治外法權曰籌議教案曰禁止嗎啡皆我補救國計民生要圖幸就範圍實有裨益馬凱於定議後補請入約者二款曰修改稅則年限曰約文以英文爲憑查係照舊約辦理爲約中應有之義共計十六

欵臣等按馬凱所請加稅之款意在不得抵原撥釐金五百萬以外之洋債賠款及挪作別用恐各省再將貨物收捐業已先後奏明本定八月初二日畫押馬凱又接英廷來電必欲增叙詳明以慰加稅洋商之意駐英使臣張德彝亦稱英外部謂擬加之稅務須降旨歸督撫提用否則不能畫押似英廷用意總慮稅加而釐不能撤臣等詳細審度彼雖請全數撥還各省而內叙各省向解北京及應還洋債仍如數照撥我復照會聲明應撥各項即留存海關聽候戶部與各省商定抵解將來戶部如何商定派撥劃抵由我自主彼亦無從過問且現議償款易金還銀正以我財力竭蹶爲言則加稅聲明祇抵裁釐不涉賠款可見毫無盈餘藉可杜列國之口實畫押已延多日即於八月初四日亥刻會同英使馬凱在上海畫押蓋印疏入報聞同時又續改內港行輪章程十款自滬蘇滬杭蘇杭三綫外江蘇則有海門綫自上海東至海門蘇鎮綫自蘇州至鎮江鎮寧綫自鎮江至寧波自鎮江鎮清綫自鎮江至清江浙江則有餘姚綫自餘姚至波舟山綫自舟山至波海門綫自海門至台州之安徵則有廬州綫自廬州至江西則有南昌綫自九江至南昌湖北則有武穴綫自武穴至

自漢口至岳州綫自漢口至岳州湖南則有湘潭綫自岳州至湘潭常德綫

自岳州至常德而福建亦有水口梅花兩綫皆發自福州又議湖南辰州府斃英教士案是

月英交還關內外鐵路是年英皇愛惠將加冕特命貝子載振爲專使往賀先期遞國書向例須候各國專使齊集同見英皇特定單班先見屆期行鞠躬禮英主答禮各述頌詞答詞二十九年春二月與英訂滬甯鐵路借款合同初英於光緒二十四年欲攬自滬至甯鐵路令英商怡和承辦已議草約旋以拳匪亂延緩久之始定議以年息五釐借英金三百二十五萬鎊張之洞乃上奏言借英金三百二十五萬鎊虛數九扣年息五釐五十年爲期准其分次印售金鎊小票如中國國家有款撥給或中國紳富集資願購借款總數便應照減撥還淞滬鐵路工價後即將已成車路暨備造滬甯全路作爲借款抵押所獲餘利銀工司得五分之一即照售票應分之數另給餘利憑票十二年半後每百鎊加給二鎊半隨時可將小票贖還二十五年後便照一百鎊原價取贖毋庸加給至餘利憑票年期屆滿分給餘利即時作廢毋庸取贖造路期內就本付

息路成以後贖票撥本悉在鐵路進款支給全路訂定五年全竣設無事故逾此期限銀公司五年內應得餘利全行扣罰上海設立總管理處一所本省督撫與督辦大臣會派總辦兩員會同英員專理工程另由南洋大臣加派一員職銜相當隨時查閱賬目稟報督撫稽核洋工司祇管工程不能干預地方公事凡所建築悉應順治華人意見尊敬中國官員借款期內不收專稅如日後中國推設各項稅捐如印花稅之類別項商稅一律徵收則滬甯鐵路亦應照准全路雙軌地畝總公司自備仍由銀公司墊款另須購地於標界之外預備日後推展商務所必需一併加售小票綜計不得逾英金二十五萬鎊年息六釐在中國應得餘利項下支給不能仍由鐵路進款支付此項加售購地小票並無年限隨時可以取贖造路購用中外材料按照西例每百給五此外別無絲毫加用漢陽鐵廠自造料件訂明儘先購用凡遇調兵運械賑饑各事照核定車價減半給發儘先載運侵碍中國主權概不得經由此路正約簽定草約作廢十二個月不興工即將正約註銷中國祇認英國銀公司不准轉與他國

及他國之人民報可十月又與英訂滬甯路電交接辦法合同三十年四月英
新任水師提督率大小兵船十艘抵滬欲進長江張之洞聞之電阻英提督僅
以四艘入江至江甯而止是年與英訂保工條約時英於南斐洲新屬欲招華
工開礦政府援咸豐十年約與訂專章至是約成遣領事於華工駐在地善視
之三十一一年四月與英續訂滇緬電綫約款英派委印度電務司貝林登爲議
約專員電政大臣袁世凱委道員朱寶奎與議貝林登又請添造江通至思茅
副綫一條不許遂定議簽押又與英訂道清鐵路借款行車合同初英使向總
署索英商承造鐵路五條不許英復援贛務合同許有修築鐵路由贛山連送
贛產至河口以達長江欲修澤襄鐵路嗣以襄陽至漢口水道不能通暢請改
道澤鐵路欲在河南懷慶府與蘆漢銜接渡河後折入安徽正陽關以達江蘇
江浦縣之浦口改名懷浦鐵路總署以懷浦遠跨豫皖名爲緯路實已斜互南
北隱然增一幹路以爲有妨蘆漢仍不許英使乃請修由澤州至道口鐵路許
之鐵路大臣盛宣懷等與議借款爲目二十一行車款十英金七十萬鎊五釐

行息九扣交付折實六十三萬鎊又同時訂擬設山西鑄化廠及合辦礦務合同並請修廣州九龍鐵路英使復請借款合同須由外務部將上諭照會立案方允畫押許之三十二年四月與英訂藏印條約初中國於光緒十六十九兩年與英訂藏印條約然藏哲界牌既未建立英人入藏細則久久未定二十九年印督遣兵入藏次年春度大吉嶺據江孜其夏遂入拉薩及達賴私與英訂約駐藏大臣有泰始入告而英藏約已成政府命有泰與英議廢約無效復命外務部左侍郎唐紹儀爲議約全權大臣赴印度與英外部專使費利夏會議費利夏欲我認印藏新約方允改訂紹儀不可英遂欲停議紹儀不得已與商訂約稿六條外務部王大臣以約內第一款有英國國家允認中國爲西藏之上國一語最有關係電紹儀使改上國爲主國費利夏持不可約久未定九月召紹儀回京而以參贊張蔭棠爲大臣接辦約事外務部商諸英使薩道義測約稿第一條英政府允諾而其他條款則不容再改然費利夏仍堅持初議數促蔭棠畫諾即第一條亦不能增減一字蔭棠力拒之會英廷新易政府繼任

者乃飭薩道義在京續商久之始議訂正約五條未幾片馬交涉又起片馬處滇緬交界之間屬於騰越英併緬甸至是兩國會勘境界至片馬附近各執爲本國土地久不決時英又欲遣工程師勘騰越至大理中間道路請中國保護滇督丁振鐸照會英領事以滇現奏設公司自行修造與前會勘時情形不同請勿派往英使朱爾典旋照會外務部云據光緒二十八年二月初七日照會英得有承造新街至騰越鐵路之權而承辦此段較短之鐵路英政府不能視爲足抵光緒二十四年三月准法政府或法政府所指之法商修造勞開至雲南府鐵路之利益外務部覆引中緬附約謂第十二條載明中國答允將來審量在雲南修建鐵路與貿易有無裨益如果修建即允與緬甸鐵路相接是該處中國境內鐵路應由中國自行審量道光緒二十七年九月十九日十六等日本部先後復薩前大臣照會均一再守此旨並聲明法國鐵路由雲南邊界修至雲南本爲條約所准與滇緬約意不同緣兩國交涉各有約章可據固不能相提並論也述二十八年二月初三日准薩前大臣照稱本國署理騰越

烈領事不日將往雲南府與滇督面商鐵路邊界各事宜滇緬鐵路相接爲振興商務之舉凡在滇省允給法商之利益應一體允給英商本部當以原照所稱面商鐵路邊界各事宜又稱滇緬鐵路相接曰邊界曰相接均係按照原約立論故於是月初七日以據咨滇督也嗣於本年正月准滇督文稱准英務領事照會接烈領事來電奉緬政府電擬由新街達騰越修造一鐵路以便商人運貨先派公司勘明可否能修再議商辦當復以派員會勘各修各路各出各費等語是滇與英領事所迭次議商者亦均扼定約章鐵路相接之一語毫無刺謬本年五月滇督奏請修理騰越小鐵路籌款自辦奉旨允准原期中國雲南境內次第修建以符與緬路相接之權乃貴大臣來照以爲英政府得有承造新街至騰越鐵路之權並引二十八年二月初七日之文爲據而以允給法商之利益相比例實與中緬附約暨本部迭次照會之意不符蓋不認英有造騰越鐵路之權也三十三年正月與英訂九廣鐵路借款正合同初英既得九龍即請承修由廣州至九龍鐵路總署令督辦鐵路大臣盛宣懷與英商怡和

洋行議辦已簽草合同五條旋因事未行至是又以爲請外務部電知粵督岑春煊以此項草約雖云仿照滬甯辦法而滬甯路長費鉅九廣路短費少情形不同應查酌第二款熟權利弊派員與中英公司研商以符原議四月與英公司代理人羅士漢蘭德議岑春煊欲照津榆鐵路辦法漢蘭德以成議在先不允由粵到京與唐紹儀等接議久之約成議借英金一百五十萬鎊照虛九四折納年息五釐以本路作抵押三十年爲期滿十二年半後按照列表分期還本二十五年以前如欲於表額外多還股本每英金一百鎊加還兩鎊半中英公司代售此項股票其股票填明價值若干鎊由中國駐英大臣與英公司商定所有建路及一切工需均由粵督督辦其重要職司應用中國人允當開工時即於廣州設立總局一所總理造路行車各事由總督派中國總辦一人管理佐以英國總工程師及總管帳各一人均由總督核准英公司辦事出力給予酬金三萬五千鎊兩期交付其一切用錢暨酬勞費均在內並聲明此路確係中國產業倘自本合同簽定之日起八個月並未興工即作廢紙所載權利

均不得讓給他國中國亦不得另建一路以奪本路利益旋簽押六月政府命湖南巡撫岑春煇查辦雲南與英畫界失地案先是雲貴總督丁振鐸委候補知府石鴻韶與英領事烈敦會勘騰越北段尖高山以北界從尖高山起向北勘越高黎共雪山直抵麗江府所管地烈敦執定以大啞口爲界石鴻韶執定以小江邊爲界貴州提學使陳榮昌奏參石鴻韶定界有失地事政府命岑春煇查辦春煇派候補道沈祖燕往勘旋覆稟云卷查烈領事此次所勘之界係從尖高山起東至胆札山過狼牙山磨石河頭搬瓦了口姊妹山大啞口茨竹了口片馬了口直上高黎共雪山北往西藏所云大啞口即爲恩買卡河與潞江中間之分水嶺其照會石道有云由明光河頭直上高黎共雪山頂由山頂北往西藏凡水入金沙江者概歸緬甸管理等語若不幸照此定界則是由滇而獨而藏邊界之地所被其割去者當以數千里計外務部所謂直是分割華境是斷不能允從可無庸置議者也若石道所擬以小江邊爲界係從尖高山起由磨石河頭直上歪頭山過之非河經張家坡登高良共山又抵九角塘河

順小江邊復另行橫出上至小江源又至板廠山爲止查其所勘之界於騰越保山雲龍龍陵各屬土司素所管轄之地數百年來向化中國者一旦棄去不少又言北段界務自以外務部所言之界綫由尖高山起至石我獨木二河之間循恩買卡河至小江西恩買卡河之東之分水嶺爲界按此嶺當是他夏甲大山最爲持平且英使本有以小江即恩買卡河以東之分水嶺作爲定界又云天然界綫係自東流入恩買卡河即小江諸江之分水嶺等語與此正合則此次勘界即於恩買卡河循流而行至小江止已足滿意且所勘滇緬北段本祇爲騰越與野人山之界則必執定騰越諸土司之屬地及野人山之分界處以畫界自是一定不易之理而與小江即恩買卡河以東之分水嶺又自東流入恩買卡河即小江諸江之分水嶺並與譯出薛星使福成二十年簽押英文圖內之恩買卡分水嶺其部位亦均相符合石道併不先自詳審界限而惟處處曲徇以致失誤此眞爲人意料所不及者也查此次勘界英使既言以小江即恩買卡河以東之分水嶺爲界又言自東流入恩買卡河即小江諸河之分

水嶺既明曰以東又明曰自東流入何以任烈領事之混爲西流竟勘至狼牙山迤北至大啞口而止此其誤者一又外務部覆稱明有各守邊界之文此爲甘裨地茨竹派賴燒殺之役而起各守之地自即在此何以不實守此小江邊界之說至小江順流而下而反另向東行指鹿爲馬再直上別尋一小江源至板廠山爲界此其誤者二又英使所言天然界綫乃自東流入恩買卡河即小江諸水之分水嶺而烈領事所勘乃指恩買卡河與龍江之分水嶺謂嶺之東所有溪河均入明光龍江嶺之西所有溪河均入恩買卡金沙江以此嶺之東西爲中緬之分界石道不能明據小江東流力爲駁斥而乃以山形水勢則然一語含混答覆而竟任烈領事之隨意所指東西自便此其誤者三且即如英使照會恩買卡河與潞江之分水嶺之說此嶺即爲大啞口亦祇西勘至片馬了口爲止何以任烈領事直上高黎共雪山竟借測繪王生勘至麗江府屬蘭州邊界始回也此其誤者四又小江外如噶戛等寨係騰越屬之茨竹大塘土司所轄籠榜係保山屬之登埂土司所轄確鑿可據乃烈領事照會言貴追來

示謂已辦諸化外而石道覆稱又言業經聲明久在化外石道實在勘界並不
援據力爭而反先自認久在化外實所不解此其誤者五又茅貢等寨原係滇
灘屬土司所轄本中國舊有之地不過英兵曾經至此並強收門戶稅而已並
非英人實已占爲屬地而中國有允認之明文也乃石道照會謂早經貴國辦
過案件不復管理竟絕不置辨此其誤者六至於大啞口外如甘稗地等各處
烈領事欲仿三角地成案作爲永租既欲議租則已明認爲中國之地正可趁
此力駁使之無辭可遁計大啞口外共有一十八寨其地甚廣豈可輕棄且既
認租則茨竹派賴燒殺一百十四命之案明是入我中國之界正可提議使之
不能諉卸何以絕不辨論此其誤者七又狼速之地甚爲遼闊一名狼宋大理
府志我昌散處於狼宋曹澗趕馬撤之間道光十八年准兵部議以趕馬撤曹
澗等寨歸雲龍州管轄則狼速乃大理府屬境若如石道所勘另尋一小江源
至板廠山爲界則不特噶曼等一十八寨拊諸化外且並將狼速地一帶地方
亦概棄之不問矣此其誤者八然此八者其害尙祇在滇省也更有大誤足以

爲將來之後患者一則小江外之狼速地一旦棄去再北而爲怒夷其地踞龍
潞兩江之上流東接維西中甸直通麗江北與四川之巴塘裏塘諸土司相接
西北即可以通至西藏一則高黎共雪山之地任其節外生枝自往履勘將來
若果曲從則即可從此高黎共雪山之頂沿潞江金沙江之上流由北直進不
特球夷怒夷之地去其大半即維西屬之鋪拉籠西藏屬之擦瓦龍一帶皆將
被其所侵佔所失之土地豈尙可以數計岑春煇得覆即據以入奏上諭革石
鴻詔等職仍不允時因津鎮鐵路借款直隸山東江蘇三省商民欲廢約英不
允允改章德與英同英又因鄂境修造粵漢川漢兩路需款欲借款於中國却
之是年山西商務局與英福公司議定贖回開礦製鐵轉運合同初晉省礦由
晉商與福公司商人羅沙第訂立合同旋於光緒二十四年復由商務局紳商
與福公司改訂借款章程二十條三十一年又經盛宣懷續立合同四條案久
未結至是商務局員紳並全省代表各員在京開議訂定贖回自辦合同十二
條贖款行平化寶銀二百七十五萬兩由山西商務局擔任按期交清三十四

年二月與英訂滬杭甬鐵路借款合同先是滬杭甬鐵路已立有草合同四條一訂草約章程與滬甯鐵路章程一樣二將來訂正約仍與爾後商定核准之滬甯正約一樣三從速測勘四如有地方窒礙之處即行更正俟訂正約即會同入奏至是浙江紳士籌辦全省鐵路欲廢前約收回自辦英使不允因命侍郎汪大燮等與英公司改商借款辦法久未決於是政府再命侍郎梁敦彥接議分辦路借款爲兩事路由中國自造除華商原有股本儘數備用外約仍需英金一百五十萬鎊卽向英公司籌借按九三折扣交納年五釐息以三十年爲期並聲明如所收此路進項不足由關內外鐵路餘利撥付凡提用款項均由郵傳部或其所派之人經理此鐵路建造工程以及管理一切之權全歸中國國家英公司代購外洋材料機器以三萬五千鎊作爲酬勞一切用銀均在內選用英總工程師一人仍須聽命於總辦等語遂定議九月與英訂藏印通商章程是年借英滙豐及法滙理銀行欸收回京漢鐵路宣統元年四月督辦鐵道大臣張之洞與英及德法美四國銀行訂粵漢川漢鐵道借款草約豫定

六百萬鎊會之洞卒復與盛宣懷立約續成之又與英及德兩公司續訂津浦鐵路借款合同共二十四款借英金五百萬鎊年息五釐路工四年造竣二年英人以兵力據片馬設礮台於高黎貢山侵踞小江以北茶山土司地滇人大憤各省人亦起應之遂電政府請力爭滇督李經羲亦請外務部與英使交涉英卒不退兵三年復派員與英劃境不省是年度支部尙書載澤與英及德法美締結一千萬鎊借款契約以改革幣制及東三省興業爲詞是爲四國借款契約又與英訂禁煙條件原議十年遞減至是中國以爲國內栽種吸食漸已減少欲縮短年限禁絕與英特訂專條期印藥不入中國而第三條又言廣州上海二口爲最後之結束不能驟禁於是煙卒不能禁矣

清史稿

邦交志三

法蘭西

法蘭西一名佛郎機在歐羅巴之西清順治四年來廣東互市廣東總督佟養甲疏言佛郎機國人寓居濠境澳門與粵商互市仍禁深入省會法人素崇天主教康熙以來屢禁漢人入教道光二十五年法商赴粵詣總督署請弛漢人習教之禁總督耆英據以入告許之開堂傳教仍限於海口禁入內地咸豐三年十二月有法輪船一艘入長江未幾解纜去而法與英美又欲變通成約廣東總督葉名琛以換約未屆期拒之遂偕英美巡赴天津要求如英美并請釋陝西傳教人長蘆鹽政崇綸等以聞上以定例五口通商外不許外人擅入內地何以陝西盤屋縣有法人傳教飭令詳查並嚴詞拒之乃去時粵賊踞上海築礮隄防禦吉爾杭阿因向法提督辣厄爾告以賊築礮隄爾國領事署首當其衝應速遣以免受傷辣厄爾立毀其隄并礮擊賊事聞獎之六年六月英美

各國求換約法公使顧思照會兩廣總督葉名琛援約與英美一體力阻不從
七年十二月二十一日英人結法公使噶歷爲援襲入廣東省城擄名琛以去
先是法人謂有人殺其說書老人向名琛索犯限三日交出並要求五事一入
城二索河南地三求改章程四索補兵費五求通商限日答覆名琛回牒許通
商餘皆不許而又不設備遂至被擄英法連檣赴天津美俄亦相繼至各有所
求法人又欲推廣商埠任意傳教遣公使駐京入內地買絲茶並請查辦廣西
西林縣殺馬神父案皆不許八年三月法與英人攻踞海口礮臺進逼天津於
是命大學士桂良吏部尙書花沙納往議徇所請遂於五月定約法得通商傳
教及兵費幾與英等九年五月法公使布爾布隆以進京換約爲名隨英公使
普魯斯赴天津拒不納致傷敗數百人折回上海噤言調兵復仇未幾法人復
北駛分擾登青等處十年六月隨英來攻連陷新河唐兒沽北岸礮臺遂入天
津先是遣西甯辦事大臣文俊武備院卿恆祺往議不報至是又遣桂良恆福
爲欽差大臣往津會談冀緩師而法與英益恣要求初津約原許補法軍費二

百萬英四百萬至是英索倍加法欲照英數復要求天津通商京師長駐朝旨不許乃隨英督兵北上進逼通州京師戒嚴怡親王載垣等再議和不就進蒲京師八月恭親王奕訢留守再議和九月和議成所得通商軍費權利與英等而傳教建堂初無限制十月始定傳教之人須薙鬚服中國衣冠其入內地預領中法合同護照向所過地方官鈐印以爲信據法人以江南爲新許商埠欲早通商請助勦粵賊不許十一年二月法公使布爾布隆偕英使普魯斯由津如京此爲各國公使駐京之始先是條約有還清軍費始行退出廣東省城之議至是法人哥士耆來言願先撤兵退出粵城並求廣東藩署實作領事署又索還京城及各省天主堂舊基均許之九月交還廣東省城同治元年正月粵賊陷蘇松常太等郡朝議募洋將助勦法人與焉是年貴州提督田興恕殺教民毀天主堂法使哥士耆以爲言朝廷命崇實賂秉章勞崇光及張亮基入黔查辦久不決會哥士耆回國新公使柏爾德密至始允照中律擬結同治四年法請開江甯商埠五年議招工章程七年冬四川酉陽州有殺傷教士案又有

貴州遵義民教仇殺事法使羅淑亞上書稱遠臣歸咎於中國官吏且言富離京往津候本國水師提督到後偕行以爲要挾命湖廣總督李鴻章查辦久之始結十二月始遣欽使總理各國事務衙門章京志剛係家數偕美前使蒲安臣至法遞國書見其國主那波倫第三復見其后各致頌詞成禮而退九年夏五月天津民擊殺法領事豐大業初天津喧傳天主教堂迷拐幼孩抉眼割心爲藥料人情洶洶三口通商大臣崇厚等詣法領事豐大業赴堂同訊觀者屬集偶與教堂人違言磚石相拋擊豐大業怒徑至崇厚署忿誓至擬以洋槍出遇劉傑復以槍擊傷某僕遂羣起毆斃豐大業鳴鑼集衆焚燬教堂洋房數處教民及洋人死者數十人事聞命大學士直隸總督曾國藩赴津查辦國藩至津示諭士民宣布懷柔外國息事安民之意法公使羅淑亞來見以四事相要曰賠修教堂曰埋壑豐大業曰查辦地方官曰懲究凶手尋牒請將府縣官及提督國瑞抵罪國藩拒之與崇厚會奏稱仁慈堂查出男女訊無被拐情事懇降諭各省俾士民咸知謠傳多係虛誣請將道府縣三員均撤任查辦奏入報

可遂於八月擬結辦爲首十數人天津府縣減戍黑龍江十一年法遣全權大臣熱福里如京換約並進書籍十二年穆宗親政各國請覲見法與焉是年法人侵越南入河內省城光緒四年始遣兵部左侍郎郭嵩燾以英使兼法使明年代以太常寺少卿曾紀澤越南向隸藩屬自法據西貢脅越人訂約許於紅江通舟曾紀澤與法外部言法越私立之約中國不能認不省八年二月法兵船由西貢駛至海防進口三月陷河內省朝議始遣提督黃桂蘭等軍出關既而法公使寶海向北洋大臣李鴻章要求中國退兵及通商保勝驅逐盜賊盡紅江南北爲界朝廷下各督撫議法人見不允所求遂欲增軍撤使以相恫喝九年三月戰事起法據南定旋爲劉永福所敗會越王堯法以兵脅嗣王立新約二十七條盡攘其兵權利權政權並申明越境全歸保護中國不得干預中國聞之乃命唐炯徐元旭出關彭玉麟辦粵防張佩綸會辦軍務會山西北甯連陷官軍退守太原法乘勢擾浙閩陷基隆澎湖至是始宣戰十年二月諒山大捷法忽請和帝命吳大澂陳寶琛張佩綸會辦海防以議和全權任李鴻章

先是福祿諾所擬五條僅允不索兵費不入滇境而要挾中國不再與聞越事議久不決五月法兵以巡防爲名忽攻諒山敗走藉口中國不能如約退師責賠費不允法使巴德諾出京六月攻台北基隆爲劉銘傳所敗秋七月法水師提督孤拔等率兵船入閩泊馬尾等處迫交船廠欲據爲質時張佩綸以會辦海防兼船政大臣漫不設備法遂開礮毀船廠復分兵擾東京臺灣陷基隆窺諒山十一年春正月犯鎮南關楊玉科戰沒旋收復大創之並砲斃孤拔於南洋法人乃請和願照天津原約不索償款李鴻章與議新約十條一法自行弭亂華不派兵赴北圻二法與越自立約或已定或續立中越往來不礙中國威望體面亦不違此次約三六箇月會勘界北圻界處或稍改正以期兩益四法保護人民欲過界入中國邊員給照華人入越請法給照五保勝以西諒山以北通商華設關法設領事北圻亦可駐華領事六三個月內會定商款法運越貨稅照他處較減七法在北圻造鐵路中國若造鐵路雇法工八此約十年再修九法即退基隆二月內台灣澎湖全退中法前約照舊等語旋法派戈可當

代爲駐華公使欲改前約出所擬二十四條鴻章以與原約不符不許戈使又欲辦滇粵礦務及製造土貨運越南食鹽復拒之又欲於雲南省城及廣西內地設領事時正遣鄧承修周德潤與法勘界鴻章謂宜俟邊界勘明方能指定通商碼頭戈使又要求稅則減半鴻章祇允五分減一又另擬通商章程十八款並將互交逃犯洋藥進出口各條亦擬在內法使復援咸豐八年約內第七款有工作二字仍要求增入在口製造許之時雲南界務周德潤會商岑毓英後出關與法使狄隆晤商擬先勘保勝上游一二段並同擬全局辦法八條一中法兩國勘界大臣等說明所應勘之界俱是現在之界一勘現界後或有改正之處兩國勘界大臣公同商酌如彼此意見不合各請旨商辦一續開勘雲越交界中國大臣等意欲一律勘完所以照會法國請旨一各大臣等商議先由老街勘到龍膊河及龍膊河鄰近地方復回老街再勘老街鄰近地方一勘老街至龍膊河之界中法繪圖各官從紅江南岸歸一路同走中國繪圖官歸法國保護自老街起至龍膊河止兩國勘界大臣等各走雲越邊界一紅河自

北河岸之老鑿至南岸之龍膊以河中爲界一雲越之界遇有以河爲界均以河中爲界如有全河現在歸中國界者仍歸中國現在歸越南界者仍歸越南一勘界時隨處開節略圖說均由兩國大臣等畫押以上節略彼此畫押遵守德潤與狄隆各按地圖校改互有爭執而於大小賭呪河猛授猛賴兩段爭執尤力會法勘路弁兵在者蘭被越游勇所戕法指爲雲南提督散勇中國不承狄隆欲緩勘但就圖定界粵東粵西界務鄧承修與張之洞李秉衡等會商其與法使浦理燮在關門文淵會議承修執約內北圻邊界必要更正以期兩國有益之語欲以諒山迤西自芄葑高平省至保樂州東自祿平那陽先安州至海甯府劃歸中界浦使以據約不過於兩邊界址略爲更改不能及諒山及東西地旋允請示本國卒不行十二年復議界會浦理燮病僅由鎮南起勘至平關而止東西不過三百餘里餘未履勘浦理燮旋回國法改派狄隆由滇赴粵與鄧承修等議界先是鴻章欲先議界後議商約法使不從乃復議商約至是議成十九款一保勝以上某處諒山以北某處中國設關通商許法設立領事

二中國可在河內海防二處設立領事並可商酌在北圻他處設領事惟須後日三兩國領事駐紮及商民通商均須優待四中國人在越置地建屋及官商往來公文書信電報法尤保護遞送五兩國游歷人過界各發給護照六七出口貨照稅則三分減一進口貨照稅則五分減一估價之貨爲稅則所未載者進出口仍照值百抽五徵收至洋土各貨赴內地買賣應完子口稅不在減徵之列八九載明洋土各貨在邊關已完稅復轉運通商各海關者均照海關稅則另收正稅不以邊關單作抵其在邊關所領存票亦只准在邊關抵稅概不發還現銀十至十二嚴防詐僞偷漏之法十三定洋人自用雜物免稅之法十四定洋土各藥不准販運買賣十五米穀等糧不准販運出中國邊關進關准免稅違禁物各禁十六中國商民僑居越南所有命案賦稅詞訟等件法國應優待十七中國人犯罪照中律法領事宜拘送不得庇匿十八十九定條約續修期限及互換遵守各事是爲滇粵邊界通商約既定鄧承修即赴欽州之東興與狄隆議勘東界狄隆以中國所屬江平黃竹白龍尾爲越境鄧承修

以數地皆內地有圖可據不許辯論不治狄隆又約履勘承修欲照雲南分途履勘辦法並請先撤江平法兵越日復議請旨立約三條一大段相合二較圖不合作爲未定各請示本國三勸其去江平之兵及辦事官員又令以後未定界內不得再派兵及官員前往狄隆不允轉要承修不得於未定界內駐兵時張之洞所派道員王之春李興銳亦與會議議界將及一年中國屢請撤兵法兵分屯江平黃竹石角旬冬白龍尾等處如故會總署允承修所定三條承修命王之春往議狄隆執不允而法人突以兵踞白龍尾騷害汛兵華民築營壘承修詰令撤退狄隆諉之時桂界已校竣欽界南自嘉隆河北抵北崙十萬山分茅嶺西至峒中墟北亦允歸中國而白龍江平狄隆謂須以商務抵換又以九頭山未讓及之春與議亦無效狄隆又欲讓海界以津約所無未奉旨讓海界卻之法又欲以白龍江平抵換龍州通商初恭思當來華也即有求改商約之請總署以界務方殷且商約既經畫押何能議改拒之至是復以爲請並以商務苟可通融界務亦可稍讓稱已奉本國訓准令在京商辦總署以狄隆與

鄧承修議界久不決允與商辦恭思當始允中國廣東邊界除現在勘界大臣劃定外所有白龍尾及江平黃竹一帶地方並雲南邊界前歸另議之南丹山以北西至狗頭寨東至清水河一帶地方均歸中國管轄又議減稅總署以俄國通商章程辦有成案滇桂邊界皆爲陸路不得不酌議減稅以歸平允於是議進口稅減十分之三出口稅減十分之四滇土藥每百觔定稅釐各二十兩必完釐者方准法商完稅接買並不准法越商人往入內地販運高平諒山往來之船隻免徵稅仍納船錢惟運販食鹽接辦鐵路及越南與滇粵通商進出口稅則均請減半運中國土貨往中國各海口稅則減三分之一各節均拒絕刪節計訂商務續約十條界務續約四條又照會緩設領事及法在龍蒙等處之領事等官不得設立租界二端是爲與法勘界通商續約十四年法領事藉口華船常到海防向廉州請示驗船戶須向領事領照無照即將船扣留張之洞以條約向章所無海防各國船隻均可往何獨華船不許嗣聞法領事張貼告白收取船規每船輪銀自數元至數十元不等云係法使所定之洞致總署

請其停止收規是年法人請接中國兩粵電綫許之又芒街法兵越界焚劫那沙之洞致總署請向法使責賠償十五年法船駛進瓊州所屬崖州東百里之榆林港測探水道上岸釘椿插標阻之法領事又在北海徵收漁船照費政府以有侵中國主權不許十月定界委員李受彤與法官勘東興一帶河界定議此後河中淤有沙洲近華者歸華近越者歸越河道即有更改無論河在何境兩國均許行船是年法使以華兵駐越南之板邦爲言又稱那沙墟不在中國界內實在北圻橫模社對面先安河北岸與板邦相近又稱去冬官兵迎收被剿敗匪係指離芒街八里之甯陽大廟對面大河北岸而言並命查復嗣李受彤復電謂州西分界自八莊歷板興板山冷峒止前有溝離越南峒中三里即以此溝爲界冷峒係丑艮寅向峒中係未坤申向那沙在西北戌乾亥向峒中墟居中兩旁有溝水向西合流入先安河以方向論溝西南概爲越地溝西北概爲華地以社論那沙與板峒爲建延社地與峒中爲橫模社地無涉以交界論那沙北歷那懷約二十五里即北岩係廣西上思州地以欽差所定界圖論

那懷屬我那沙即附連那懷相離僅三里前並無墟去年正月峒中墟華民始由峒中遷此去年十一月以前法未諭溝到此十二月始有焚殺那沙墟事撈去婦女隨即給銀放回其法官自向婦女言係諭界誤筆再查界圖西北有板邦隘係廣西地又土人言橫模西南離六十里有板邦屬越地峒中之東並無板邦只有板奔離峒中約九里係內地去年秋萃軍防營駐此因疫退駐板興今板奔並無防勇又查甯陽離芒街十餘里在東興西南中隔河必船乃渡即有勇亦難迎庇且並無勇等語又馮子材電亦云然張之洞以兩說歧異由於華民以溝水爲界法以先安河北岸爲界溝卽河也原圖均未指明那沙係去年正月新立之墟距界甚近故致彼此爭執既悉板邦隘另是一地實屬廣西十六年九月歸逃人魏名高等十八人十七年八月法使林樁改擬新咖雷多尼招工合同第十四條緣第十四條中國原擬派員作理事官林使不允改作爲華工統領所得權利僅止赴訴公堂及請狀師理論李鴻章以所改仍與工頭無異焉得有權保護不許時湖南民攻詆洋教法領事欲赴長沙開馬頭設

教堂阻之十九年四月請東興芒街接修電綫粵督以前辦界案尙有數十里至今未定遽與接綫界未劃定之處歸何人保護必致多生齟齬仍促先速定界二十年法使日海遞國書又議寓越華人減身稅事並論暹羅邊界李鴻章據英與法議暹羅交界有贖脫地應歸中國日海不允三月與法會勘欽越界初法派巴拉第法蘭亭均以約內載明屬我之板興嶺懷等處爭爲已有政府不允至是法改派柯麻登其總辦賴釐咳接辦粵督李瀚章派李受彤與會勘始知巴拉第法蘭亭所爭險要與越南皆隔深溝峻嶺而溝尤多因與約定按界綫有水處以水爲界有山處以山爲界計長四百里陸界僅五十里皆峻嶺餘悉溝界惟披勞縱橫約三里各分一半餘如原勘圖約所載分茅嶺板興板典嶺懷等處及峒中十里均歸中國時滇越亦議界滇督王文韶不允爭已定界祇就黃樹皮箐門及猛岡各處向駐有華兵處緩撤兵以待法防之至界約遂定二十一年中日約成法求換商約界約遂許開龍州蒙自等埠並與越界綫內猛烏烏得一地初中國認此二地爲寄洱縣屬車里土司之地法使謂舊

屬越遂歸法有二十三年法要求瓊州不割讓租借於他國許之二十四年法乘廣東雷州人殺其士民二人以兵艦據廣州灣來商租借言爲停船屯煤之所無損中國主權而所租借跨高雷二府之間由海岸以入內地所得東海兩洲各島及赤坎志滿新城等處均歸入租界又得吳川之半島及通明港是年又以兵強佔上海寧波四明公所義地害人罷市幾激變久之始定時廣西永安有殺斃法教民之事方釀辦犯劾官賠償建堂四條適值北海鐵路造至南甯援龍州鐵路案中法合辦法使遂要求將鐵路歸併教案議久始允就案議結不及他事又施南宜昌長沙均因教堂教民啟衅未結二十六年春拳匪亂法人調兵與德英俄美日本聯軍入京復督兵西進至廣昌屢阻之二十七年展漢口租界是年法遣鮑渥爲駐華公使二十八年外務部與法隆興公司總辦彌樂石訂雲南礦務章程先是彌樂石到滇與礦務大臣唐炯議欲設中西礦務公司唐炯入告奉旨交雲貴總督魏光燾等與彌樂石議歷七閱月始竣乃入奏略謂一初議限制中國公司延聘礦師貸用洋款後亦不入別國洋股

專用英法礦師定議一運礦自修鐵路接通滇越幹路訂明俟幹路成時再議
並禁售票搭載客貨預存限制一公司收買山地按民間租價公平租賃地由
滇官指交價由公司照給逾限三年不辦原地歸還業主一完納礦稅議定按
出井出爐礦質每百抽五抵納稅課並派員分礦監收通彌樂石由滇入京向
外務部催訂合同外務部告以礦地未定未便先議章程並不准攬辦全省彌
樂石尤指激江臨安開化雲南楚雄等府及元江州永北廳凡七處載入章程
第一款內將原議嗣後別國公司概不准來滇辦礦改爲嗣後別國公司概不
准在公司所指之地勘采以清界限彌樂石以原議包辦全省礦利故願歲給
京銅一百五十萬斤並津貼員弁兵勇護廠銀二萬兩今既改爲七處應請減
議定繳京銅一百萬斤護廠費由公司給發不拘定數招募土勇改爲稟請地
方官招募遴選武官一員管帶遂定議惟第一款內載有公司等出之金銀煤
鐵五金白銅錫及火油寶石硃沙礦尤給公司承辦等語滇督魏光燾以礦類
白金白銅錫三項爲原章所無因咨外務部請照滇中前定原章照會英法公

使轉令彌樂石仍將三項刪除二十九年總理外務部慶親王奕劻與法使呂班訂滇越鐵路條約二十四條一鐵路自河口抵蒙自或由蒙自附近至雲南省城日後擬改須彼此商准二至四勘路繪圖及交地購地各事五各項廠棧同時開工六鐵軌寬一邁當七鐵路經過地方不得損壞城垣公署八九購料及挖取沙石採伐林木各事十運路及暫時興工各地用竣後即交還十一幹路造成商接支路十二各執事凡須專門學者可用外國人十三四工匠之招募管理及賞卹傷亡懲辦犯罪各辦法十五巡丁可募土民不得請派西兵十六洋員請給護照事十八租賃房屋事十九不得損及民人產業有則賠償二十火藥炸藥之運製及防險二十一運貨納稅免稅各例二十三收費減費免費各例二十四鐵路不准載運交鹽及西國兵械如中國有戰事悉聽調度二十八設專門學堂二十九設電綫電話三十一滇省派員襄助公司三十二定公司補償中國資費各員來往照料費三十四此路十八年期滿中國可與法國商議收回是年法人因吉林教案索賠償三十年秋七月法使館交還

欽天監觀象臺儀器二十八件三十一年奪法商欲自上海至紹興行輪阻之是年與各國定值百抽五稅則法有違言久之始允三十二年春正月二十九日南昌縣知縣江召棠被殺於天主堂先是召棠辦教案頗持正法教士王安之因上年在港教案有二教民鄧貴和葛洪泰在南昌縣監禁強請釋放召棠向索縱囚其一匿法教堂中王安之不交函約召棠會飲被殺民情大憤集眾毀法教堂傷斃王安之及教習等數名並波及英教堂久之始定法人欲坐召棠自刎及派兵船來贖責償命鄂督張之洞查辦屢執件傷單及醫憑單與爭終徇其請賠以法銀二十餘萬三十三年法遣領事入滇商辦事六月蒙自法郵局設代收遞人役詰之九月索還法人所佔塘沽碼頭宣統三年與四國銀行定粵漢川漢鐵路借款合同原借五百五十萬金鎊五釐行息專爲築造粵漢川漢兩路法與英德美均與焉

清史稿

邦交志四

美利堅

美利堅在亞美利加洲初來華貨船常至粵東道光二十一年英因鴉片之役詔停貿易美爲英人請准貨船入口不許二十二年與英和許零波互市美商船由定海駛至甯波請報稅通商浙撫劉韻珂以聞朝旨以美通商向在粵東不許已復請增商埠將軍伊里布以聞許之命與英併議稅則明年三月美商船駛至上海求通商拒以稅則未定既聞英通商章程已議定復請援英例開市又稱進口洋參鉛斤二項稅則繁重請減輕以百斤取五爲率江督耆英等以洋參鉛斤歲來無多允酌改美人福士又請入覲不許冬十月福士忽稱有使臣顧盛來粵仍求覲見並遞國書欲與中國商議定約並稱沒蘭的灣兵船欲赴天津諭令折回不省二十四年四月美兵船進黃浦阻之答以進口專爲約束商民防範海盜無他意又責中國款待要求甚堅者十款耆英等屢與駁

詰於是酌定條款如商船納鈔已畢因貨未全銷改往別口轉售免重征又商船進口並未開艙即欲他往限二日出口不征稅鈔又商船進口納清稅餉欲將已卸之貨運往別口售賣免重納稅鈔此外又許其於貿易港口租地建禮拜堂及殯葬處所又許延請中國士人教習方言佐理筆墨及採買中國各項書籍又增入商人擅赴五口外私行交易及走私漏稅携帶鴉片及違禁貨物聽中國官自行辦理治罪一款遂定議尋進國書耆英請賜詔書褒美許之二十六年諭通商傳教祇許在五口不得羈留別地緣美人在定海傳教非條約所許故也十一月美使義華業來粵呈遞國書初欲入覲面呈耆英等以條約折之乃已成豐三年七月美酋馬沙利來粵接辦本國公使事務齋有國書仍欲進京投遞中國持定約不許時賊氛未靖美兵船忽至滬揚言往鎮江等處察看賊情並整頓海口商務如督撫不與會晤當繕奏資往天津投遞蘇撫許乃釗以聞命赴粵聽欽差大臣察辦同時美兵船又入琉球琉球王世子咨閩浙總督王懿德懿德以聞命粵督葉名琛曉諭使撤回兵船四年六月美麥蓮

至上海要求赴揚子江一帶貿易請代奏江督怡良諭令回粵候葉名琛察辦
麥蓮返粵名琛不予接見乃復回上海與英法人往見蘇撫吉爾杭阿要求赴
天津變通成約吉爾杭阿拒之不聽既而船至天津命長蘆鹽政文謙等復阻
之仍以進京求覲爲詞遞清摺要求十一款駁之惟華洋訴訟豁免積欠及廣
東茶稅每擔加抽二錢允與商辦麥蓮等遂去六年美人伯駕來粵請換約時
英人包令法人顧思同至亦請換約與伯駕同赴天津朝命葉名琛阻之旋駛
至福建逃國書要求公使駐京中國遣大臣駐美京華盛頓朝命閩浙總督王
懿德約回廣東嚴詞駁之伯駕不省八月偕本國水師提督奄師大郎乘火輪
至上海云奉國主命必須入京覲見屢諭不從是年減免美在滬未繳關稅因
粵賊滋擾美商受損失故也七年十月美遣新公使列衛廉來粵代伯駕會英
人虜葉名琛省城被據美人來滬投遞牒大學士裕誠文願勸和裕誠覆以已
命黃宗漢赴廣辦理外國事務可速赴廣東會晤八年二月美隨英法調兵船
來津命直隸總督譚廷襄等接晤美使與俄使普提雅廷同見廷襄欲變通舊

約未允五月命大學士桂良吏部尚書花沙納爲欽差大臣與美使列衛廉定約初美條款要求添商埠保教民立塔表鑄銀元賠損失防凌害船隻駛揚子江及粵東珠江並各支流文移達內閣使臣駐北京丈量船身計噸納鈔法以各用法律治本國人民特援最惠國利益均沾之例載入約中迄未行至是復請冬十月定通商稅則桂良致書美與英法使臣議通商善後事極陳領事之弊美列衛廉覆書略謂美國商民進內地按天津條約利益均沾是則美進內地所有請執照等情應同英法一例俟國主及國會議允批准和約後必明立律例交領事禁止不請執照或強請執照等事致免國民違犯中國憲典又整理有約無約各國之法本大臣向知此事應變通今請將中國所能行者略爲陳列按泰西各國公使凡此國領事奉遣至別國者若不得所往之國準信延接即不得赴任今凡有稱領事而中華國家或省憲地方官不肯明作準信延接者彼即無權辦事是則中國於此等兼攝領事即可推辭不接已延接者亦可聲明不與交往設有美國人兼攝無約領事藉作護身符以圖已益者地方

官可却不與延款遇有事故令彼投明美國領事自應隨時辦理間或美國人兼攝領事而代無約商民討求地方官協助申理地方礙情代爲辦理者亦可對彼說明並非職守當然祇由於情面而已又若此等自稱領事有與海關辦理船隻餉項事宜者地方官可却以必須按照條約遵行倘彼固執已見干犯則例者中國地方官應用強禁阻前在天津時本大臣照會桂中堂花冢宰以中國必須購造外國戰艦火輪船者特爲此故足徵所言非謬也又領事不得干預貿易現美國定制凡干涉賣買者不得派作領事官又領事與地方官爭論前此動多抵牾本大臣深爲恨憤業經設法將一切事宜妥爲辨正嗣後果有仍前事款請照知本大臣定當修正若領事官不合之處地方官按理據實直斥其非不與共事此最善之法也總領事之設美國奉使駐紮中華者從無此制領事官亦無發給旗號之事本大臣復嚴諭領事嗣後不得有此以上據問直達猶有管見須照知者中國宜立國家旗號俾中國公私船盡行升用蓋美國制度凡本國人必用本國旗號泰西各國莫不皆然今中華貿易之盛而

無旗號以保護何不亦仿他國之法使商船與盜賊有所區別而免商民之借用與假冒外國旗號哉桂良據奏厥後中國造船購戰艦用龍旗多采其議九年夏五月美使華若翰遵滬約改道北塘呈遞國書諭旨嘉獎七月換約還所據前附和英人之蔣什坡美使回滬請照新章完納船鈔及在潮州臺灣先行開市欽差大臣兩江總督何桂清以前大學士桂良等給與照會言明各口通商俟英法條約議定再照新章辦理不服乃允先開潮州台灣兩口市及照新章納船鈔餘仍從緩十年美船隨英法聯軍北駛是年美國書及原本條約稅則遺失特命蘇撫薛煥先與說明照俄國一律以通行刊本爲憑美人許諾十一年四月始至漢口通商旋立九江市埠先是三月美水師總領施礪烈倫以火輪船至九江尋去至是美商擇地勘定九江城西琵琶亭空地三十畝以地勢低窪興工建築居民以未給價阻之領事別列子始赴道署許照英國價例給發九江關監督以此地在大街繁盛之區與龍開河偏僻有水者不同駁詰之別列子去監督因牒駐漢口總領事始許依民間賣買又增索至五十畝

是爲美立九江市埠之始秋七月美設領事於漢陽並代理俄國漢口通商
務又爲美人在漢設領事之始同治元年粵賊陷蘇太各城上海爲各國通商
之地蘇松太道吳煦招募壯勇雇洋人領隊有美人華爾者煦令管帶印度兵
既印度兵遣撤煦令華爾管帶常勝軍協守松江屢出討賊有功奏給翎頂又
白齊文者亦美人因華爾進命並在松江教習兵勇協同官軍勦賊屢立功華
爾旋攻慈谿陣亡秋七月美伯理璽天德林肯亞伯刺罕遣使蒲玲堪安臣致
皇帝書二年白齊文不遵調遣毆傷道員楊坊並劫餉四萬餘元事聞視白齊
文職命蘇撫李鴻章拿辦白齊文匿英兵艦美使蒲安臣以白齊文爲美國人
覆牒爲代辨無罪總署以白齊文受中國官職應照中國法律懲辦辨駁久之
美使始代白齊文認罪白齊文尋投賊被獲牒美使衛廉士述其罪狀請照前
議亟予正法美使覆以請示本國白齊文尋溺死六年十月以美卸任使臣蒲
安臣權充辦理中外交涉事務使臣時外洋諸國公使領事等先後來華於是
特派蒲安臣以英人柏卓法人安德善爲左右協理志剛孫家毅二員同往會

辦緣蒲安臣充美公使最久中外交涉總署深相倚任故特派往特與議定條款凡事須咨總署覈定准駁試辦以一年爲期又以中外儀節不同呈遞國書須存國體又慮各國因蒲安臣係西人以西例優待當告以中國體制使各國了解不致疑中國將來無報施之禮迭咨蒲安臣蒲安臣遂西是年美羅妹商船至台灣之瑯瑤洋面遭風船破被生番戕害又前有美商船羅發遭風飄至臺灣極南海島亦被害至是美住廈門領事李讓禮欲坐兵船赴台住泊八月到瑯瑤會台灣鎮總兵劉明燈究詰此案而龜仔角生番糾集十七番社謀抗拒劉明燈招番目卓杞篤往諭始知五十年前龜仔角一社之番悉被洋人殺害僅存樵者二人以致世世挾仇圖報因諭番人解散勸李讓禮無深究免再結仇李讓禮許諾遂議結既而李讓禮請在象鼻山設立礮臺未九七年春二月美使來言前年九月有本國商船兩隻在高麗閣淺被害尙餘四人請轉知高麗設法救護政府請高麗自行查明酌覈六月美人派兵船入高麗國王李熙奏聞中國查明並無羈留美人情事函致美使代爲解釋美使乃無言其兵

船亦啟旋去是月蒲安臣等至美遞國書並增定條約其要目有八一美國與他國失和不得在中國洋面奪貨劫人二除原定貿易章程外與美商另開貿易之路皆由中國作主三中國派領事駐美通商各口四中美奉教各異兩國不得稍有屈抑五兩國人民互相往來游歷不得用法勉強招致六兩國人民互相居住照相待最優之國利益均沾七兩國人民往來遊學照最優之國優待並指定外國所居之地互設學堂八美國聲明並無干預中國內治之權其時曾國藩等鑒於道咸間條約失利特建議遣使往訂此約於領海申明公法於租界爭管理權於出洋華工謀保護且預防干涉內治云九月美使勞文羅斯來華遞國書並呈書籍及五穀各種請換中國書籍穀種許之九年三月美遣鑣斐迪充出使中國大臣遞國書前使勞文羅斯回國四月中國出使大臣蒲安臣在俄病卒特予一品銜給卹銀萬兩十年正月美致朝鮮函請中國代達謂將以兵船前往商辦事務中政府以權宜許爲轉達旋接朝鮮咨謂美使所投封函專爲曩年美商船來韓一遭風遇救一人沒貨無以爲一救一害相

懸太甚欲請究治朝鮮以己國無殘害美船之事不允所請並請中國降旨開諭美使美使以降旨開諭是以屬國相待不受乃以兵船抵朝鮮脅之朝鮮人不服與力爭並報中國牒美使解之十二月美請援例開瓊州商埠十一年春二月許美國領事官代辦瑞士國商務瑞士國一名蘇益薩又稱梭沙蘭其商船至中國向以無約小國不設領事官至是請美領事官代辦商務美使牒稱遂次蘭國總署覆美使以瑞士事務祇可照料不能兼攝至通商納稅等事仍照向來無約各國祇許在海口通商其內地口岸及內地遊歷設局招工等事均不得一律均霑美使照覆更正遂次蘭爲瑞士美領事雖得照料瑞士國商務不得稱瑞士國領事官十二年春穆宗親政美隨英法俄德請覲見十三年美使鑣斐迪回國以艾忒敏爲駐華全權大臣覲見面遞國書光緒二年十一月美旗昌公司歸併中國招商局南洋大臣沈葆楨奏請給價銀二百二十萬兩報可四年出使大臣陳蘭彬等蒞美呈遞國書旋請設領事言華人僑美各邦約二十餘萬不設領事無以保護華民奏入許之五年美前統領格蘭忒來

華值日本滅琉球政府因格蘭忒將遊日本託其轉圜格蘭忒至日本函勸中國與日本各設領事保護琉球中部其南部近台灣爲中國屬地割隸中國北部近薩摩島爲日本屬地割隸日本兩國均不允又請派員會議卒不得要領六年七月美遣使臣安吉立及修約使臣帥腓德雷銳克來華請與中國大臣議事總署以聞並言同治七年中國與美續增條約其第五款內有兩國人民任便往來得以自由等語近來金山土人深嫉華人奪其工作不能相容上年美議院曾有限制華人之議經其總統據約批駁去年彼國開議又欲苛待華人經副使臣容閔牒外部言與約不符始將此例停止是華人在彼得有保護者惟恃續增條約之力居多今遣使來華恐有刪改續增條約之意請派員商議奏入命總署大臣寶璽李鴻藻爲全權大臣與美使議約初美續約第五款祇言兩國人民往來及遊歷貿易久居等人無華工字樣至是美使安吉立等遞修約節略內稱華工分住各口不下十萬人於本國平安有損請整理限制禁止總署以禁止一層與舊約不符惟限制一層尙可酌擬章程安吉立等以

章程須由本國議院酌定此次來華祇求中國一言許其自行定限總署遂入奏與安吉立等議定四款凡傳教學習貿易遊歷人等仍往來自由其已在美華工亦仍舊保護惟續往承工之人定人數年數限制不得凌虐遂畫押蓋印期一年兩國御筆批准互換既而美金山於中國招商局和衆輪船進口有額外加徵船鈔貨稅之事出使美國大臣陳蘭彬等請乘美派人來華議約之際與交涉時美使安吉立亦牒總署詢中國徵收美國各船稅鈔與徵收中國及別國船稅鈔是否相同又中國在常關納稅鈔之船是否均與新關納稅鈔之船相同各等語又欲將兩國商民貿易有益之事及兩國商民爭訟申明觀審辦法加入約款總署以商民貿易一款原可隨時商辦觀審一款本煙台條約所載此次申明與原議亦無出入因與定議仍候兩國御筆批准互換明年六月鈐印八年三月美欲與朝鮮結約通商遣總兵齋孚爾爲全權大臣乘兵船往議約朝鮮遣余允植赴保定謁見李鴻章請代爲主持與美使商議美使旋出所擬約稿其約稿未提明朝鮮爲中國屬邦鴻章請刪改齋孚爾執不允會

美署使何天爵在京與總署議允增屬邦字樣而內治外交仍許朝鮮自主九年出使美國大臣鄭藻如請於美紐約設領事官略言美國西通太平洋以金山埠爲首站東通大西洋以紐約埠爲首站兩埠爲往來必經之路金山業設領事近紐約華民往者日見增多土人不無嫉忌兼以古巴一島與紐約水路相通華民由古巴回籍者必假道紐約實爲通行要路請仿金山例設領事以資保護報可是年美與朝鮮換約遣使駐朝鮮漢城朝鮮遣使報之仍咨中國禮部僅報聞而已十年中法因越南啟釁招商局輪船商人籌照西國通例暫售與美國旗昌洋商保管旋事定仍收回十二年春美舊金山華民被美西人虐害中國索賠總統却之粵人聞之大憤爭欲起抗粵督張之洞恐其滋事一而曉諭粵民一面致總署及駐美使臣與美交涉請其賠償懲辦因疏言出洋粵民所訴焚劫殺逐種種遭害臚列各案內如光緒十年十二月天李架埠一案焚舖逐商劫財七萬餘元十年七月二十五日洛市內冷埠一案慘殺慶臣頌等二十八命傷十五人焚毀舖屋財物值十四萬餘元七月二十八日舍路

埠一案慘殺莫月英等三命焚燒煤廠約值數萬旋將華人盡逐八月十一日
倒路粉坑一案枉殺李駒南等五命九月二十八日喊能埠一案焚逐失財數
萬十二月初四日尾矢近地一案慘殺伍厚德等二命皆爲無辜被害其餘密
謀殺害不可勝紀以致卓忌埠禮靜埠則有被逐之事興當埠拓市埠喜路卜
埠鈴近埠匿架市埠洒市埠鉢倫埠云乃埠坎下埠古魯姐埠粒卜綠埠亦皆
有定期議逐之事其金山大埠華民住房則有十苦之訴洗衣裳館則有六不
近情之訴統大小各埠工商人等則有七難之訴所謂十苦者金山大埠住房
每人限地八尺不足八尺者查拏監禁謂之挈房挈房之苦計地少絀同居概
捉一也監後寓財盡竊無追二也回華有期暫寓被禁三也到埠資乏借寓亦
拏四也畏捉夜行臥街被打五也工藝出監無處傭食六也監房地狹疾瘋益
增七也入監勒銀始任贖出八也監鬱鬱亂被翦違制九也昏夜巡查破窗越
屋十也所謂六不近情者洗衣館八九百間木樓木屋歷數十年乃借防火私
擅勒令改建甌樓鐵門既非美廷所命別處又不一律一也拆改不獨勞費工

衆無處容身二也軋鐵本重租貴主客兩受其害三也曬棚謬謂惹火別處樓棚更多四也任意掣人罰銀被擾至數百問五也洋館木樓曬棚何以不用此律六也所謂七難者一爲欲守業之難二爲欲拒匪之難三爲求保護之難四爲居散埠之難五爲居大埠之難六爲業工者之難七爲業商者之難等語又言金山各埠始則利華民之工勤價省多方招徠開礦修路諸工美商藉華工以獲利者不知其幾千億萬乃因埃利士黨人嫉妬把持合謀驅逐殘毒焚掠以奪其資財勒逼行主辭用華工以斷其生路華工既無生計華商亦遂賠折窮蹙留不能留歸不能歸保護亦無從保護情形實爲危慘假如將此十餘萬華民盡行驅歸中國沿海各省何處容之既屬可閔亦多隱憂此外南洋諸埠設皆踵事效尤何堪設想美與中國雖無嫌隙但此事係由美境土人專利而起其視華工究不免稍分畛域且美國官員近亦多有埃利士黨人在內多設苛政實有此情應請敕催美國嚴懲速辦初沙面燒洋房十四間價款至鉅至是出使美國大臣鄭藻如電張之洞請查案援例之洞以金山殺掠重情過之

十倍應照本案華民所失之數賠足並須財命兩究電覆令與交涉先是美使田貝允電本國速辦時新任張蔭桓爲美使仍留鄭藻如會同經理既而美調兵緝匪斃匪一名傷數名美總統及議院亦漸議護禁久之始允賠尋議寓美華工約定約六款首言中國以華工在美受虐申明續約禁止華工赴美次言華工在美有眷屬財產者仍准往來三言華工以外諸華人不在限禁之例並准假道美境四言華人在美除不入美籍外美國仍照約盡力保護五言華工人被害各案美國一律清償六言此約定期二十年互換議定畫押復命張蔭桓再與籌議蔭桓以三端要美一請酌減年限二請訂約以前回華之工如有眷產亦可稟報中國領事補給憑批回美三回華工人在美財產不及千元者作何辦法亦應商及議久不決十四年四月廣西桂平縣美教士富利淳醫館被毀領事索賠五千餘元拒之時粵民憤華工見拒羣起抵制且歸咎張蔭桓會命翰林院侍講崔國因代爲美日祕國出使大臣十六年國因到美美戶部忽訂新例於假道華民入境索質銀二百元出境發還下議院又議立限清查

寓美華民戶口給照國因力與辯例旋廢初金山新例拘執華人令徙遷者限
地界以華工居處不潔釀疾爲言至是始廢例銷案時換約期將屆適楊儒出
使總署又以商改新例事委之儒洩美值美迫行華工註冊新例當援條約駁
詰美外部始商允議院展限半年被拘工人釋放而於註冊之例堅不改移華
工以例專分別新舊工人舊工固有安居樂業之便而新工因限禁不能到美
厥倩律師控訴察院欲除此例美外部以例經議院議定不能廢仍限華人註
册而總署電儒以先修約後註冊爲關鍵儒當牒外部並就十四年約稿刪去
賠償一款易爲互交罪犯原約二十年之期改爲十年旋又接總署電言美必
欲先行註冊擬令寓華美民亦註冊以相抵制屢議不決既美外部謂交犯一
款與限禁華工保護華民不相涉應另訂專約不列款內十年之期可以允從
寓華美工亦聽中國註冊楊儒力爭寓華之美國教士亦須註冊遂擬除工人
外寓華別項美民自換約日起美政府允每年造册一次報知中國政府乃定
議並於第五款中寓華別項美民下註包括教士在內二十年二月畫押蓋印

是爲重訂限禁華工保護華民約款又立互交罪犯約約既成楊儒復籌寓美華民善後事宜因上言華工在美始自咸豐年間光緒六年始有限制工人之約華人寓美洋人指爲風俗之害者約有三端一曰鴉片一曰賭博一曰械鬪今惟有將此諸弊力圖革除一在申明律例治以各項應得之罪中國不爲袒庇一在詳示教條使知目前限制之故皆與煙賭械鬪各弊有涉俾各愧奮改圖庶不至爲人厭薄此治本之法也至於治標之法一在嚴禁冒商俾真商不至受累一在疏通工路使新來之工得以謀生海外如此不獨華民生計可紓即中外邦交從此愈固矣是年中日啟釁美代中國保護在日本華商明年四川福建教案相繼起而古田案尤劇美與英法均請中國償款辦犯議久不決既而美使田貝函總署稱有各國耶穌教人公舉在華辦理教務教士李提摩太惠志繕冊摺擬呈查閱請謁見允之二十三年美人在上海侵占租界外地初美所租同治初年止九百餘畝後美領事西華自畫界圈入未租民地萬餘畝光緒十九年十月兩江總督劉坤一飭將界綫內東北未租地收回二千六

百畝而於西北界外所占之地未及清釐至是美領事在蘇州河邊自立界石而河內地起建樓房署兩江總督張之洞請與英法界外侵占同嚴禁疏入交議二十四年出使大臣伍廷芳見德與中國因膠州失和請聯美略謂美合衆爲國其保邦制治國律以兼併他洲土地爲戒溯自海上用兵以來美兵船皆由英軍牽率而至道光二十一年粵東議款美實居間排解遂得定盟咸豐九年英法闖入大沽毀我防具美守前約船由北塘駛入呈遞國書情詞謙遜先換約而歸是通商以來美視諸國最爲恭順此次守約惟謹不肯附和雖因古巴議自主檀島議兼隸近在同洲大局未定不遑遠略亦因與我交誼素篤故不從合從之謀若能聯絡邦交深相結納似與大局不無裨益又因檀香山歸併於美請設領事保護華民略謂檀香山居太平洋之衝前本君主後改民主近因弱小求庇美邦設爲行省美議院業經議行此島華民不下三萬人向由商董立中華會館排難解紛光緒七年曾令商董陳國萬爲領事後美禁華工抵埠華民出洋皆趨檀島請設領事報可是年中國議修盧漢粵漢甯滬甯漢

四路借款各國美國願貸四百萬鎊於粵漢路旋聘美工程師勘路二十六年拳匪作亂各國聯軍入京既各國會議條款美惟增教案被議人員不准復用之條餘未與附和會俄與中國訂退還東三省約中國復請美政府排解明年和議成議償款四百五十兆美所分得償金三十二兆九十三萬有奇合美金二十四兆四十四萬餘元除給商人損失及海陸軍費外尚有溢出數十二兆七十餘萬元美總統羅斯福向議院提議溢出金仍還中國助中國教育即以此款為格致學生留美之用議行牒中國中國特遣專使唐紹儀赴美申謝既而各國賠款欲改銀為金以金價算美為商勸各國並謂衆議合案四百五十兆兩由各國自行均派中國不管其易作何項金錢是此項賠款照約載金價核算即四百五十兆海關銀數照約銀數付還亦即與用金付給無異美旋允照約還銀二十八年春三月議各國商約美使不願加稅至十五免釐與否聽中國自便是年命呂海寰盛宣懷議美約與美使迭次磋商張之洞劉坤一通電參酌始定議因上言釐定約款十七條大致與英約相同而其中得失捐益稍

有區別第一款曰駐使體制美使原送約文聲明駐使可以行文各省將軍督撫駐紮大臣駁以美國向由外部轉行中國亦係由外務部咨轉不能兩歧駁令刪去改爲中國駐使爲美國優待是以美使駐京中國亦一律優待以昭平允第二款曰領事權限報施一如駐使而聲明美國領事按例委派外務部按照公例認許如所派不妥或與公例不合我即可不認冀以挽回主權第三款曰口岸利益此係查照日本舊約不能不許因卽比照日約核改妥協第四款曰加稅免釐此爲全約主腦美使初祇允加至值百抽十並請我裁內地常關又不提明銷場出廠等稅以爲中國主權所係不欲有所干礙屢費磋商動至決裂臣等往復電酌彼始允加至十二五其所裁內地常關之稅任我改抽出產稅以爲抵補竊思內地常關不過十餘處各省土貨未必悉所經由按照英約載明進出口貨加稅後均得全免重徵則內地常關亦祇能徵土貨運出第一道之二五半稅若非第一常關則並無稅可收至土貨未經第一常關徵過二五半稅者出口時仍須徵足七五之數是常關雖裁亦無大礙今旣任我改

抽出產稅則從源頭處抽收較無遺漏似更合算當時尙以與英約兩歧爲慮
 美使自認將來勸英照辦祇得允裁至於銷場稅出廠稅及議增之出產稅美
 使雖不願詳載名目而於專條中聲敘本款所載各節毫無干礙中國主權微
 抽他等稅項之意以渾括銷場等稅保我主權第五款曰稅則附表彼請美國
 人在中國輸納稅項較最優待之國不得加重另徵臣等索其增入中國人民
 在美國納稅亦如之一節第六款曰准設關棧係照英約酌辦第七款曰振興
 礦務前半悉照英約彼請准美國人遵章開辦礦務此本路礦衙門定章所許
 因訂明美國人民辦理礦務居住之事應彼此會定章程以資鈐束第八款曰
 存票抵稅第九款曰保護商標均與英約意義相等而於存票款中聲明除去
 船鈔一項以補英約所未及第十款曰創製專照此款深慮有礙中國工藝仿
 造駁論再三改爲俟中國設立專管衙門定有創製專律後再予保護其權仍
 自我操第十一款曰保護版權即中國書籍翻刻必究之意與之訂明若係美
 文由中國自繙華文可聽刊印售賣並中美人民所著書籍報紙等件有礙中

國治安者應各按律例懲辦爲杜漸防微之計第十二款曰內港行輪前兩節照英約大意聲明嗣後無論何時修改應由我查看酌辦末節如奉天府安東縣開埠事扼定自開而辦法略有變通第十三款曰改定國幣將英約所附照會納稅仍照關平一節增入款末第十四款曰韓陸民教教民犯法不得因入教免究並應遵納例定捐稅教士不得干預中國官員治理華民之權詳晰列明冀資補救第十五款曰治外法權第十六款曰禁止嗎啡鴉片皆我素其增添與英約一律第十七款曰修約換約期限係照立約通例復於約款之外另行訂附件三端一爲內地徵抽鴉片鹽勑稅捐之事及保全稅捐防範走漏之法均任由中國政府自行辦理二爲所留通商口岸之常關設立分關保持稅餉三爲申明第五款所載稅則附表即前定切實值百抽五之稅則至內地常關雖裁並不藉此以裁北京崇文門並各城門及左右翼等處之稅由美使備一照會存案又第四款不礙征抽他等稅項一語尙涉籠統由我備一照會聲明他等稅項即係包括銷場出廠及改抽之出產各稅應仍聽中國自行辦理

彼亦復一照會言明彼此意見相同分別簽押蓋印是爲中美商約一名通商
 行船條約三十年春美公司背約私售粵漢股票於比利時尤比在湘造湘陰
 過常德至辰州一路張之洞致湖南巡撫趙爾巽請力阻並援合同第十七條
 專認美公司不得轉與他國人爲主旨湘人讓自承辦稟請廢約趙爾巽力主
 之時張之洞已奉廷寄廢約遂以三省紳民力持廢約電致盛宣懷宣懷旋電
 出使大臣梁誠牒美外部略謂美公司顯背合同必應作廢續約十七款不得
 轉售他國現查底股比法居多事權他屬正約四十款禁別人侵壞合同現派
 非美公司之錫度來華干預全路工程逾限廣州一節逾估甚鉅請牒外務部
 註銷正續合同美政府覆牒允註銷合同仍不允廢約既而美公司舉前兵部
 路提等代議路事中國亦延美前外部大臣福士達鐵路律師良信等與之辯
 始允再集股東議售股本購價及合同特權等費必須付現又索賠給工程師
 執事人等合同未滿撤退及註銷訂購物料合同之用二十五萬久不決至三
 十一年夏始簽字久之始以美金六百七十五萬元還美再加息定議簽押

押時粵民因美禁華工並苛待留美商民私議抵拒美貨不果三十二年遣學生赴美留學三十三年美教士在河南信陽州所屬雞公山購地造房豫撫張人駿執條約公法教規與爭始允撤房退地停工卒延未撤銷三十四年八月與美訂立公斷專約初美使康格曾奉其總統命向中國提議與英法一律訂立公斷專約嗣以美總統與議院意見不合英法約作廢因罷議至是第二次和會和解紛爭之約又已盡押各國多互訂公斷專約美亦與英法日本訂約中國即電致出使美國大臣伍廷芳向美廷提議遂訂條約四款凡關於法律意義或條約解釋爲外交法不能議結者皆屬之換約以五年爲限是年美約請各國在滬會議禁鴉片事宜中國命南洋大臣端方等蒞會宣統元年春正月美使牒外務部請免收東三省新開各埠一切雜稅旋由外務部咨東三省覆稱不能免收因覆美使謂現所收各稅於各埠試辦章程並無妨礙若必欲使洋貨於抽釐一事毫無轉賴自非實行加稅免釐不可中國固甚願各國贊成斯舉也五月定留學生赴美名額因美退還庚子賠款爲中國學生赴美游

學費議自退還之年起初四年每年遣一百名以後每年至少須遣五十名遂訂辦法大綱是年美工商部新頒華人入美保護例凡十條大旨仍重在禁止限制華工影射赴美而於商賈教習學生等游歷則從寬牒外部立案並同時通咨南北洋施行二年九月度支部大臣載澤與美使喀爾霍商定借款一千萬磅利息五釐美招英法德日結爲借款團體是爲四國借款